

تحت التهديد



تم تحويل هذه الرواية الى Pdf

بواسطة موقع ايحي فور تريندس

<https://www.egy4trends.com/>

أنت تقرأ حدوتة "رواية" بالعامية المصرية، بتتكلم

عن بنت خدعت شاب وخلته يتجوزها، وبعد سنين

رجع من السفر، يا ترى هيتصرف معاها إزاي؟ وإيه
اللي جابره على الجوازة دي؟! هيتطلقوا ولا هيكملوا
سوا! تحت التهديد للكاتبه منة ممدوح البنا كل يوم
يا بنتي سليم رجع من السفر! رديت - ❏ حلقة
ببرود_ ما يرجع اعمله ايه يعني! - جوزك!
صحّحت بنفس البرود وأنا بقاوم الغصة اللي في
قلبي- على الورق، جوزي على الورق - يا منة...
قاطعتها_ متحاوليش يا سميرة، أنا عمري ما اعتبرت
سليم جوزي، ولا هو اعتبرني مراته، يعتبرني مراته
إزاي واللي بينا ورقة عرقي من وأنا عيلة مكملتش
١٤ سنة! - في الأول والأخر جوزك. ابدت العصبية
تظهر على وشي، فقومت اتحرّكت بغضب وأنا
بزق_ قولت ميت مرة على الورق، أنا مش متجوزة،

ولا عمري هعترف بالجوازة دي مهما حصل كملت
بعد ما وقفت قصاها وهي بتراقبني بضيق_لو
مش عايزة تخسريني، وتخسري ورقتك الكسبانة،
متفتحيش الموضوع ده تاني نهائي معايا، كفاية إني
قابلة القاعدة هنا وسط الناس دي بسببك بس!
_الناس دي يبقوا... _يبقوا ايه يا سميرة؟ يبقوا إيه
يا مرات أبويا؟ متخليناش نفتح في القديم،
متخليناش افكرك باللعبة اللي دخلتيني فيها وأنا
عيلة مش فاهمة حاجة وقبل ما تتكلم تاني قاطعتها
بجمود_لو سمحتِ، كفاية مش عايزة كلام في
الموضوع ده تاني، كفاية القرف اللي بحسه ناحية
نفسي إني رضيت ادخل في لعبة قذرة زي دي، لو
سمحتِ سيبييني لوحدي. بصتلي بحزن وضيق

وخرجت، ورجعت أنا اترميت على السرير ببكي
بقهر، مين تطول يبقى اسمها مقرون باسم "سليم
الشهاوي"؟، مين تطول أصلاً تدخل في عيلة زي دي!
بس للأسف أنا دخلت فيها بابشع الطرق، دخلت في
لعبة مش مدركة خطورتها وأنا لسة طفلة مش
فاهمة حاجة ولكن اغرتني الفلوس والجاه و... هو!
سليم! فارس أحلام أي بنت، واللي كانوا من ضمنهم
أنا وازاي مقعش في حبه وهو مفيهوش عيب وأي
واحدة تتمناه! ورغم إني مشوفتوش من ٦ سنين
تقريباً وتحديداً من يوم كتب كتابنا المشؤوم، بس
عمري ما بظلت أتابع أخباره من بعيد لبعيد، ولقيت
نفسي بكبر وهوايا ناحيته بيكبر معايا، عدّيت
طفولتي ومراهقتي وشبابي، وأنا قلبي بينبض

باسمه... سليم القريب البعيد، رغم قرب اللي بينا،
إلا إن فيه بينا مسافات بعيدة، بعيدة جدًا وملهاش
آخر.. رجعت بذاكرتي ل ست سنين ورا، تحديدًا في
القصر، كان عمري ١٤ سنة، طفلة طموحة بتحلم
بالفارس المغوار اللي هياخدها على الحصان
الأبيض زي أميرات ديزني، كانت كل أحلامي إن
يبقى عندي هدموم كتير وكل حاجة أعوزها تكون
مُجابهة، ولكن كنت في أسرة بسيطة عايشة وسط
رخاء، ورغم إن حالتنا مكانتش تحت أوي بس كان
دائمًا فيه فرق بين طموحي واللي أنا شايفاه، وبين
اللي أنا عايشاه. كان بابا بيشتغل في شركة والد
سليم، وسميرة برضه مرات بابا اللي اتجوزها بعد
وفاة مامتي، كانت كبيرة الخدم هناك، مسئولة عن

كل حاجة، ولكن مش بتمد إيدها في اي حاجة، بتدي
أوامر وبس زيّها زي الهانم، بس كان عندها طموح
أكثر من كدا، لكن طموح... على حسابي! ولإن بابايا
ومراته شغالين مع العيلة، فكنا مقيمين في أوض
في القصر، ولكن رغم إننا يعتبر عايشين معاهم، إلا
إنه كان فيه فرق دايمًا.. كان الوقت متأخر، الساعة
كانت ١ بالليل تقريبا، لقيت سميرة بتتحرك من
جمبي على السرير بهدوء، صحيت ببص ناحيتها
باستغراب وأنا بفرك عيوني العسلي بنعاس فلقيتها
بتخرج من الأوضة، اتسحّبت وراها باستغراب وأنا
كُلي فضول، لحد ما لقيتها واقفة تحت معاه، سليم!
كأي بنت طبيعية مكانش ينفع أشوف سليم
شخص عادي، كان بالنسبالي حلم، حلم بعيد جدّا..

سمعتها وهي بتكلمه، وكانت لهجتها فيها تهديد
شوية_هو ده شرطي، ولكن لو أخليت بالاتفاق ده أنا
مش هتردد أروح وأحكي لأبوك وعيلتك كل حاجة،
صدقني مش هتردد يا سليم وأنت عارفني كويس!
كان وشه وعيونه حمر، وعروقه نافرة بغضب واضح،
ولكن كان باين عليه الإنكسار، نزل وشه في الأرض
واتكلم بغضب مكتوم_إزاي بس! استحالة يوافقوا
على حاجة زي دي وأنا وأنت عارفين السبب كويس!
وقتها ضحكت بخبث وقالت_وأنا عندي الحل، هو
يهحصل شوية دوشة، بس مفيش حاجة تضمنلي
إن هيهصل اللي عايزاه غير ده.. رفعت راسها في
اللحظة دي ليا، وندتني بنبرة حنينة غريبة_تعالى يا
منة، تعالى يا حبيبتي واقفة كده ليه؟! نزلت ليها وأنا

ببصلهم الاتنين باستغراب، ولكن نظرات سليم
ناحيتي كانت غضب، وكره وحقد كله ناحيتي، كانه
بيتوعدي بلعت ريقى بتوتر، فقالت_إيه رأيك في
سليم؟ نقلت نظراتي بينهم بتوتر_يعني إيه يا
سميرة؟ _تحبي يكون سليم جوزك، وتبقي صاحبة
القصر ده، عندك عربيات وخدم وفلوس وهدوم
كثير، وكل حاجة أنتِ عايزاها لمعت عيوني بدهشة،
الحقيقة العرض كان مغري جدًا، سليم اللي يبقى
حلم كل بنت هيبقى جوزي، وكمان كل الأملاك دي
هتبقى ليا! هزيت راسي بسرعة بابتسامة عبيطة،
فزفر هو بصوت عالي وكأنه مخنوق ومكانش طابق
الوضع، ولإني اصغر من إني أفهم التفاصيل اللي
بتدور فمعلقتش، بس لاحظت ابتسامة سميرة اللي

زادت، مالت ناحيتي وحطت إيديها على كتفي
وبنبرة أشد حُبثٍ_يبقى تنفذي كل اللي هقوله
- ليكي، ومن غير اعتراض أو اسئلة كثير... © ٢٠٢٥

Wattp

غمضت عينيا بآلم ودموعي بتنزل غضب عني،
اتنفضت من على سريري ووقفت أبص في مرايتي
وأنا بهز رأسي بعنف ورافضة افكر أكثر من كده،
طول الـ ٦ سنين دول مش شايفة نفسي غير مسخ،
حقيرة، مادية واستغلالية ورّطت شخص بيا لمجرد
إني عايزة أحقق أحلامي على حسابه وفعلاً حققت
جزء من أحلامي، عيشت في دور خاص بيا لوحدي
في القصر متكامل من ناحية كل حاجة، كملت
تعليمي وأهو بقيت في كلية فنون تطبيقية، عندي

عربية وفلوس وهدوم كتير زي أحلام الطفولة، ولكن
قصاد كل ده خسرت حاجات كتيرة أوّلهم احترامي
لنفسى.. في اليوم ده مقدرتش أنام، فكرة إن الفاصل
بينى وبينه بس شوية حيطان مهلكة، رغم إني
معرفش تفاصيل كتيرة جوا القصر لانفصالي عنهم،
بس خبر زي ده لازم يبقى منتشر ومهلك بالنسبالي،
بعد سنين كتير مبشوفش فيها غير صورته، شوفته
وهو بيكبر من بعيد قدام عيني، كل مدى ملامحه
بتزداد رجولة، وبيزداد وسامه، وقعت في حب كل
تفاصيله من بعيد، مبقتش متخيلة إني براقب
جوزي زي أي واحدة ومليش الحق في إني أملّي
عيني منه. جوزي! حتى مفيش مرة قدرت أنطقها
ومقدرتش أفوق من الوهم ده، وهم إن سليم ممكن

في يوم من الأيام يتقبلني كزوجة ليه اساسًا ده لو
اتقبلني ك انسانة بعد اللي حصل فيه بسببي أنا
وجشع مرات بابا! كل الطرق بيني أنا وسليم
مقفولة وبما إنه رجع، فاللعبة قربت تنتهي وكل
واحد هيرجع لأصله. لكن هل أنا مستعدة؟ ممكن
اكون مستعدة اتنازل عن كل الثراء اللي أنا فيه،
بس هل هقدر أتنازل عن حقي في سليم؟ اعتقد لأ
وحتى لو مش طائلة نظرة منه حتى بس حِثة إن
اسمي مكتوب على اسمه بترضي جزء من غروري
ونفس الحثة دي بتدمر احترامي لنفسي.. تاني يوم
جهزت نفسي عشان أروح كليتي، نزلت لتحت، كان
الدور اللي عايشة فيه منفصل عن القصر من جوا،
كنت منبوذة، من الكل، حتى نفسي.. وفعلاً أنا

مكنتش قد إني اواجههم كل يوم وأنا السبب في إن
ابنهم بعد عنهم ٦ سنين كاملين! عدّلت من شعري
الطويل البني بخصلات حمراء مائلة للاصفرار، كان
لونه الطبيعي غريب بشكل ومميز! كنت لابسة
كاچوال عشان يبقى مناسب للكلية، ولابسة شنطة
باك فيها كل الادوات اللي هحتاجها. وقفت استنى
السواق وهو بيحيب العربية، وفتحت الشنطة اتأكد
إن كل حاجة موجودة فيها، وللحظة لمحتة.. خارج
وماشي بهيبة رهيبة بيتكلم في التليفون ومشغول
فيه مكشر شوية، بيرفع إيده يعدّل بيها شعره
الاسود الناعم، ويرجع يملس على دقنه النابتة
اتجمدت مكاني وحسيت إن روعي اتسحبت زي
الغريق ودقات قلبي بقت عالية بطريقة رهيبة عينيا

مركزة عليه مش مستوعبة أنه قدامي فعلاً بعد
السنين دي كلها! حسيت إن شخصيته اتغيرت من
سليم الشاب المتهور اللي كان عمره ٢٠ سنة بس
لشخص بقى راجل متكامل بمعنى الكلمة جذاب
ووسيم وملامحه رجولية بشكل! حسيت ببرودة
وصلت لأطرافي لما لقيتيه بيقترب مني اتوترت،
معقولة هيفتكربي؟ وإيه هيكون رد فعله بعد
السنين دي كلها لما يشوف البنت اللي كانت
السبب في شقلبة حياته وغربته قدامه؟ وللحظة
لقيتيه بيعدي من جمبي من غير ما ياخذ باله مني
حتى! ولكنه أخذ روعي معاه غمضت عيني بتلذذ
وأنا بستنشق ريحة برفانه اللي ملت المكان مغرية
ولذيذة، لايقة عليه تمامًا، متكامل في كل حاجة حتى

ريحة برفانه! الحقيقة حسيت براحة مؤقتة، على قد
ما قلبي وجعني إنه مقدرش يميزني، على قد ما
ارتاحت ليني مكنتش قد المواجهة الحالية، ولا إني
أقف قصاده! ولكن فرحتي مكملتش لما جه صوت
عالي من جنبي وهو بيقول _آسف على التأخير يا
منة هانم غمضت عيني وأنا بتمنى أنه يكون عدى
وبعد ومسمعش اللي اتقال، ولكن للأسف مش كل
حاجة بنتمناها بتتحقق، لأنه سمع فعلاً وقدر يميز
الاسم اللي اتردد في دماغه، اتلفت بسرعة ناحيتي،
وأنا واقفة مكاني برعب، ولكني مقدرتش أقاوم
فضولي واتلفت ناحيته عشان اتأكد، وللحظة اتلاقت
عيوننا! كان أول لقاء بينا من سنين، بعد ما كبرنا
وكل حاجة فينا اتغيرت حتى شخصياتنا

واهتماماتنا، بس اللي متغيرش هو حبي ليه، لكنه
بالعكس كان بيزيد مع الوقت. ملامح الصدمة كانت
باينة عليه، عينيه اللي وسعت وهو بيتأملني
بدهشة واضحة من فوق لتحت، وأنا واقفة مكاني
متجمدة مش قادرة أبعد عيوني عنه، قد إيه كان حلو
بشكل من قريب! دقائق قلبي العالية كشفت عن
عشقي وهوسي بيه، ولكنه كان حاجة شبه
مستحيلة بالنسبالي. وقبل ما يتحرك ناحيتي كنت
سيبته وجريت ناحية العربية. _ اطلع بسرعة يا عم
سعيد اتأخرت دخلت العربية وفعلًا قبل ما
يستوعب كانت العربية اتحركت بيا، وأنا بتأمل
ملامحه المصدومة من ورا الازار الداكن، وكان جوايا
خوف كبير من المواجهة اللي بعد كده.. مقدرتش

أركز في محاضرات خالص، طول الوقت كنت قاعدة
سرحانة فيه وفي عيونه الحادة، مكنتش أعرف إنه
مجرد نظرة لثواني هتشقلب حالي بالشكل ده! ورغم
الارهاق اللي كنت فيه بس رفضت أروح بدري
عشان مصادفهوش تاني، وفضلت قاعدة في جنيئة
الكلية مع صحابي، اللي محدش فيهم عارف بإني
متجوزة أصلاً، فما بالك لو متجوزة من سليم
الشهاوي! وصلت أخيراً البيت، اتحركت لجوا وأنا
بتلفت حوالين نفسي بتطمئن أنه مش موجود،
وتقريبًا ماشية على أطراف صوابعي.. _بتهربي من
حد؟ شهقت بفزع لما سمعت صوت رجولي جاي
من مكان معين، اتلفت فلقيته واقف مربع إيديه
وساند على الحيطه. وقفت مكاني وفقدت النطق

تمامًا، فقرب مني بخطوات بطيئة مهلكة وابتدت
ريحته تداعب أنفاسي، لحد ما وقف قدامي وهنا
ظهر فرق الطول اللي بينا، وكمل بنبرة
موترة_حمدالله على السلامة يا زوجتي العزيزة..
يتبع... اسكريبت بحلقات قصيرة متتابعة
#تحت_التهديد #منة_ممدوح_البنا

———— Part Break ————

أنت تقرأ حدوتة "رواية" بالعامية المصرية، بتتكلم
عن بنت خدعت شاب وخلته يتجوزها، وبعد سنين
رجع من السفر، يا ترى هيتصرف معاها إزاي؟ وإيه
اللي جابره على الجوازة دي؟! هيتطلقوا ولا هيكملوا
سوا! تحت التهديد للكاتبه منة ممدوح البنا كل يوم
الحلقة الثانية _مالك، إيه اللي حصلك؟! □ حلقة

جري ناحيتي بسرعة وكان باين عليه الخوف
والقلق، كنت واقعة على الأرض بتألم بعد ما
اتكعبلت ونزلت برجلي على حجر حاد شوية،
فاتجرحت رجلي وابتدت تنزل دم، غمضت عيوني
ونزلت دموعي بألم غصب عني، فمسك هو رجلي
واتفحص الجرح_اهدي، اهدي، متقلقيش حاجة
بسيطة، خليكى هنا وأنا هروح اجيب بيتادين

وشاش وقطن وآجي بسرعة. هزيت راسي بـماشي
من غير ما اتكلم، ومقدرتش أبطل بكا من الوجع،
سابني وغاب لدقايق قليلة ورجع على طول، مال
قدامي وبعدين شالني مرة واحدة، شهقت برعب
وغصب عني لفيت دراغي حوالين رقبتة وأنا ببص
للأرض بعيون واسعة وبعدين بصيت لعيونه وهو
بيضحك بشقاوة_هما بياكلوا أكلك ولا إيه؟ أنا
قولت أنتِ أتقل من كده بسماجتك دي ضحكت
من وسط دموعي ونغزته_والله ما فيه أتقل من
دمك! ضحك وحطني على الكرسي اللي في الجنية،
وبعدين نزل على ركبتة قدامي، وابتدى يتفحص
ركبتي بحنية عشان متألمش، وبعدين بدأ يطهرها
بالقطن والبيتادين، وكل ما اتحرك بألم يطبطب

على إيدي ويبصلي بنظرات بتطمني، للحظة
حسيت بأن حنيته سحبت روحي وأنا لسة طفلة
مش مدركة لأي حاجة، ولكن الحنية ليها تأثير في كل
الأعمار، وتأثرها بكون سحري! لدرجة إني مقدرتش
اتحكم في نظراتي العاشقة اللي كنت ببصله بيها. لف
رجلي بالشاش ونصف الجرح كويس، وبعدين رفع
عيونه ليا وأخذ باله إني بتأمله فابتسم ورفع إيديه
مسح دموعي اللي كانت على وشي_متقلقيش
كام يوم وهتبقي كويسة ابتسمت وبدقات قلب
سريعة_ أنا بقيت كويسة من دلوقتي ابتسم وكأنه
فهم اللي قصدته، فصدمني لما وقف وطبع قبلة
على شعري، وبعدين سابني ومشى، رغم إن
تصرفاته كانت تلقائية وكأنه مثلاً بيعامل أخته،

ولكن تأثيرها عليا كان شديد، وللأسف احنا الاثنين
مخدناش بالننا من سميرة اللي كانت واقفة هي وبابا
بيتابعوا الوضع من بعيد، وسميرة بتهمس بحاجة
لبابا خلته كشر وجه ناحيتي بملامح مليانة عصبية،
ولللحظة مسك دراعي بعنف ومراعاش جرح رجلي
اللي كان بالنسبالة حاجة هينة ودلع بنات_ابن
الشهاوي بيعمل إيه جمبك؟! ارتبكت من
الصدمة_ده كان... قاطعني بغضب_ولا كان ولا
مكانش، مشوفكيش قريبة من الواد الصايح ده تاني،
أنتِ فاهمة؟ هزيت راسي كذا مرة بدموع، فنفض
دراعي بقسوة وسابني ومشى، وكان شتان الفرق
بين قسوة بابا، وحنية سليم اللي كانت حتى في
عيونه! وكانت كفاية توقعني في حبه ميت مرة..

"الحاضر" بصتله بتوتر وفقدت النطق تمامًا، ارتبكت
وابتديت ارتجف من جوايا بشكل مش ملحوظ،
بصيت لعيونه الحادة اللي كانت مغلفة بمشاعر
كثيرة أولها الاندهاش وآخرهم الغضب كإنه كان مش
قادر يصدق إن الطفلة اللي سابها وسافر من سنين،
هي الأنثى اللي قدامه دي! خoft اكر لما قدرت
أميز إن سليم لسة مجروح من الوضع اللي اتحط
فيه زمان، وجرحه ما داواهوش الوقت.. _سليم... آآآ
حمدالله على سلامتك _ مش شايفة إنها متأخرة
شوية؟ كان لازم تتقال الصبح مثلا ولا إيه؟ كانت
نبرته مأكرة، بس بيتكلم ببساطة، بعد ما فك عقدة
إيديه وحطها في جيب بنطلونه الاسود، اللي لابس
عليه هايكول اسود، مع جاكيت جلد اسود! للحظة

استغربت إيه كمية السواد اللي هو لابسها دي، بس
الحقيقة اللون مديله جاذبية فوق جاذبيته اللي
مهلكة لوحدها.. -الحقيقة أنا كنت متأخرة.. _متأخرة
ولا خيفة.. بلعت باقي كلامي وبصتله بدهشة، ولكن
عرفت أمثل القوة_وهخاف من إيه؟ _مني مثلاً
رفعت إيدي وملست على رقبتى بتوتر_ لا خالص،
هخاف ليه! _مبتعرفيش تكدي بس غريبة، كدبك
مكشوف دلوقتي ويتميز، زمان كنت ممثلة هائلة،
الظاهر إنك مبتتدريش بقالك كثير، ولا أنا اللي
بقيت حافظك؟ عرفت هو بيلمح لإيه كويس، فنزلت
راسي بحزن وابتدت عيوني تتملي دموع، فصدمني
لما رفع وشي بإيديه بيتأمل في عيوني بقوة، قربه
مهلك ونظراته مهلكة، حسيت إن كل قوتي بتضيع

بين إيديه. _ بتنزلي عينك للأرض ليه؟ ما أنتِ قبل
كده كانت عينك مفيش اوسع منها! مسكت إيديه
اللي قابضة على دقني، واتكلمت برجاء_ سليم...لو
سمحت بص على إيدي شوية ورجع على عيوني
اللي كنت بحاول ابعدھا عنه بأي طريقة، وللحظة
يعد عني ومشى بسرعة من غير ما يكمل كلامه،
وسابني واقفة مكاني بمشاعر متضاربة، ما بين حب
أقوى مني، وبين حزن من الكره اللي شوفته في
عينيه. مقدرتش اتمالك نفسي واتحركت بضعف
وقعدت على السلم ابكي بعنف وبقهر. سليم رجع
بس مع رجوعه زود كرهني لنفسي رجوعه عزاني
قدامه وقدام نفسي يا ترى ممكن أقدر أداوي
جروحه؟ ولا جروحه مش هتتداوى غير لما اختفي

من حياته؟! بالكاد قدرت اتسند على نفسي وأطلع
لفوق، فتحت الباب بالمفتاح اللي معايا، ويدوب
دخلت لقيت سميرة في وشي، زفرت بضيق.. _ولا
كلمة، بالله عليكى متفتحيش أي حوار معايا عشان
أنا على أخري لوحدي _ شوفتيه؟ _ حاجة تخصني
_ تنكري إنك بتحبيه؟ وقفت بعد ما كنت عدت من
جمبها ومشيت، ومن غير ما اتلفت قولت _ مش
هنكر، بس لو حتى كان فيه أمل بنسبة واحد في
المية بينا، بعملتك أنتِ ضيعيته! _ بعملتي قربتكوا
من بعض! اتلفتلها بعصبية _ بعملتك بعدتيه عني
بلاد! _ متفتكريش إن لو مكانش حصل كده كان
هيفكر يتجوزك _ وأنتِ فكرك إنه متجوزني بالشكل
ده؟ أنتِ بجشعك خسرتيني سليم وأهله، وبابا،

حتى خسرتيني نفسي! قربت مني_مش أنا لوحدي
اللي كنت جشعة دمعت_مأنكرتش، بس أنا كنت
طفلة، كنت طفلة بتحلم وأنتِ استغليتِ كل ده
لمصالحك عشان تكوني الهانم ست القصر بس
_من غيري كنتِ تحلمي بالوضع اللي أنتِ فيه ده؟
قصر وعربيات وهدوم وميكب _بس مش لاقية
نفسي، لقيت كل ده بس مش لاقية نفسي يا مرات
أبويا، ولا حتى لاقية سليم وقبل ما تتكلم تاني
قاطعتها ونهيت الحوار المتعب جدًّا بالنسبالي_لو
سمحتِ، كفاية يا سميرة، لو فتحت أكثر من كده
هنجرح في بعض، وقولتلك لو مش عايزة تخسري
ورقتك الكسبانة متدخليش في أي حاجة تخصني
تاني! نهيت جملتي بزعيق، وسيبتها ودخلت الأوضة

وقفلت الباب بعنف، سمعتها وهي بتتكلم من وراء
الباب_أنا يمكن استغليتك فعلاً، بس صدقيني يا
منة، أنا بعاملك زي بنتي بالضبط _بقيتي
بتعامليني زي بنتك بعد ما حققتك اللي أنتِ
عايزاه صمت وهدوء تام بعد اللي قولته، فضحكت
باستهزاء لما لقيتها منطقتش تاني، أحياناً الحقايق
بتوجع، وهي بتحاول على قد ما تقدر تبرأ ضميرها،
بس مش لاقية مفر، وللحظة الضحك اتحول لبكا
بهيستريا، وكل ما بفتكر نظرات الغضب اللي في
عينه بتزيد دموعي، وعرفت وقتها إن اللي بيني
وبين سليم بلاد فعلاً.. جهزت نفسي بالعافية وأنا
مش عايزة أخرج من اوضتي بأي طريقة، مواجهته
استنزفت كل طاقتي، مش قادرة أواجه أي بشر

مش قادرة أمثل السعادة أكثر من كده لبست
فستان رقيق عليه فراشات، ورفعت شعري كحكة
عشوائية، ونزلت في طريقي قابلت بابا اللي بقاله
سنين مبيبصش في وشي. وقفت وأنا على أمل
يلمحني حتى ولكنه عدى من جنبي وكإني شبح،
اتنهدت بحزن وبملاح مهمومة خرجت لبرا
واستنيت عمي سعيد على ما ييجي، ولكني لقيته
وقف قدامي بعربيته الچي كلاس السوداء حقيقي
سليم عنده مشكلة مش مفهومة مع اللون الاسود!
حاولت أبص الناحية الثانية بس سمعته
بيقول_ مش عندك كلية؟ هزيت رأسي من غير ما
أرد _واقفة ليه؟ يلا _ لا عمو سعيد بيوديني _ عمو
سعيد مش جاي اتلفتله باستغراب فقال

بسخرية_ أخيرًا حنيتي عليا وبصيتيلي! _ يعني إيه
عمو سعيد مش جاي؟ حاولت على قد ما اقدر ما
اركزش في كلامه وتريقتة عشان ميحصلش مشكلة
بيننا. _ قولتله متجيش رفعت حاجبي باستغراب،
ولكني سيبته واتحركت وأنا بحاول اقلل اختلاط بيه
خالص لأن قربه بيضعفني_ خلاص هأخذ تاكسي
سيبته ومشيت وأنا شبه بجري، سمعت صوت فتح
وقفل باب العربية بعنف، فعرفت إنه جاي ورايا
وإني استفزيتة، سرعت خطواتي أكثر وملامحي
اتبدلت للرعب. وللحظة لقيت قبضته اتملكت من
دراعي، وشدني بعنف ليه لدرجة إني بقت قربية منه
بدرجة... مهلكة! رفعت كف إيدي على صدره قبل ما
اقع عليه، وشهقت بفزع، بص لعيني من قريب

بعيونه الحادة اللي كانت مليانة غضب _ أنتِ عامية
ولا إيه مش فاهمة! مش شايفاني واقف قدامك،
تاكسي إيه اللي هتروحي تاخديه؟ شديت دراعي
منه بعنف وقولت بقوة مصطنعة _ أنتِ بتزعق
وبتشتم ليه مش فاهمة! مش أنتِ اللي قولت لعمو
حسين ميجيش، أخذها مشي ولا إيه عشان
يعجبك! _ أنتِ بتمثلي الغباء ولا إيه؟ ولا دي من
ضمن مواهبك المتعددة؟! سكت وضميت شفايفي
بضيق شديد، فانتفس هو بعنف وحاول يتمالك
أعصابه على قد ما يقدر.. _ أمشي أنا هوصلك _ لا
شكرًا _ مش بعرض عليك على فكرة كتفت
دراعي _ وأنا مش عايزة _ مش بمزاجك _ خلاص
مش راحة الكلية النهاردة اتلفت ونويت امشي، بس

شدني تاني من دراعي بعنف، بعدت عنه بعصبية
وقولت_مالك ومال دراعي مش فاهمة كل شوية
تشدني منه، بينك وبينه تار ولا حاجة عرفني يمكن
أحل الموضوع بينكوا! وشي كان احمر وكنت بتكلم
كلام عبيط ملهوش علاقة ببعض، سكت شوية
بيبصلي باندهاش شوية وبعدين اتبدلت ملامحه
وضحك! ضحك والحقيقة ضحكته خلتنني اركن كل
عصبيتي وزهقي وتوتري على جنب وأفضل اتأمل
فيه بملامح والهة.. سكت وبصلي بعد ما لاحظ
تأملني فيه، لوهلة حسيت بعيونه بتلمع، ولكنه
تمالك نفسه بسرعة واتبدلت ملامحه للجمود وكأنه
مصمم بيني حواجز بينا._امشي يلا هوصلك _ليه؟
_عشان جوزك مثلا _على الورق اتلفت وبصلي

بسخرية_ ما دي كانت اقصى امنياتك، وأهو
اتحقق، ولا إيه؟ _ سليم... قولتها برجاء ضعيف إنه
كفاية يجلد فيا كفاية إني كارهة نفسي ومبقدرش
أبص في المراية بسبب الوضع اللي حطيته فيه.
لانت ملامحه وحسيته اتأثر بنظرتي، ولكنه رجع تاني
وقال بقسوة_ إيه بكذب؟ اتنهدت بألم_ لا مبتكدبش
مبتكدبش للأسف يا سليم قولتها وسبقته وركبت
في العربية، فضل واقف مكانه شوية متابعني
بمشاعر متضاربة كإنه بيصارع حاجة جواه، وبعدين
حط نضارته الشمس على عينه وركب هو كمان،
طول الطريق حاولت محتكش بيه على قد ما أقدر،
فضلت ساندة على الازاز بتأمل الطريق بحزن تخيل
لما يكون مفيش غير خطوتين بينك وبين أكثر

شخص بتحبه واتمنيته، ولكن في الحقيقة
الخطوتين دول مسافة كبيرة كبيرة جدًا لدرجة
متتخاش.. يتبع... # تحت_التهديد #

Wattp - منة_ممدوح_البنّا © ٢٠٢٥

———— Part Break ————

أنت تقرأ حدوتة "رواية" بالعامية المصرية، بتتكلم
عن بنت خدعت شاب وخلته يتجوزها، وبعد سنين
رجع من السفر، يا ترى هيتصرف معاها إزاي؟ وإيه
اللي جابره على الجوازة دي؟! هيتطلقوا ولا هيكملوا
سوا! تحت التهديد للكاتبه منة ممدوح البنّا كل يوم
تحت التهديد" الحلقة الثالثة _إيه يا " □ حلقة
سميرة اللي ملبسها هولي ده؟! بصيت للهدوم اللي

مكانتش تليق بطفلة زي نهاي بضيق. _بابا لو
شافني لابسة هدومك هيضربني مسكت كتفي
بقوة_اسمعيني، مش أنتِ قولتِ إنك عايضة تتجوزي
سليم؟ _أيوه بس... _مبسش، تسمعي الكلام
وتعملي اللي هقولك عليه، مش أنتِ وافقتي
وقولتي مش هتعترضي على أي حاجة هقولها لك؟
بترجعي في كلامك ليه بقى! هزيت راسي من
سكات، وأنا حاسة إن فيه حاجة غلط، بس مش
مشكلة، المهم اتجوز سليم واكون غنية وعندي
عربيات وهدوم كتير. خدتني من ايدي واتسحبت
لاوضة سليم وهي بتتلفت حوالها لحد يشوفها،
وقبل ما تدخلني وقفت وقولت_يا سميرة هندخل
نعمل إيه جوا، مينفعش سليم يشوفني كده عيب!

شدتني من دراغي وقالت_يووه أنتِ مبتسمعيش

الكلام ليه، خلاص مش هجوز هولك طالما كده

ونفضها سيرة بقى! قالتلي وهي بتزقني عشان

نرجع فقاومتها واترجيتها_خلاص خلاص، مش

هتكلم تاني _شطورة، كده تعجبيني وقفت برتجف

وأنا جوايا رافضة الوضع ده. _هو لازم برضه ألبس..

زعقت بنفاذ صبر_أنتِ هتسمعي الكلام ولا أسيبك

واروح اكمل نوم! _حاضر طبطبت على كتفي

فابتسمت بتوتر، فخذتني من إيدي وفتحت الباب

من غير حتى ما تخط، كان قاعد عل السرير وساند

راسه على إيديه بهم، اتنفض ووقف أول ما شافنا،

بصلي باستغراب وضيق كبير وهو بيتأمل اللي أنا

لابساه، وبعدين قرب مننا_يعني مش هتتحل غير

بالفضيحة اللي هتحصل دي؟ كتفت دراعها ورفعت
حاجبها_ ما في كل الحالات هتتفضح يا عينيا، بس
فضيحة أهون من الثانية ولا إيه؟ زفر ورجع بصلي
بكره_ بس الفضيحة هتمس بنتك _هتتنسي،
بمجرد ما يتم المطلوب كل حاجة هتتنسي، يلا أنا
خارجة واللي قولته يتنفذ يا سليم وإلا أنتَ حر أنا
مبهزرش وأنتَ عارف إني أقدر أنفذ اللي قولته من
غير ما يرقلي جفن قالتها وخرجت وسابتنا، وقفت
وأنا باصة للأرض بتوتر وبفرك إيديا، وقف قدامي
وقال_مكنتش أتوقع إنها تيجي منك أنتِ يا منة،
كنت فاكرك نضيصة من جوا مش زيها رفعت عينيا
ليه_أنا مش فاهمة حاجة _مثلي يا منة، مثلي، بس
أنتِ نزلتِ من نظري النهاردة، عاجبك اللي أنتِ

لابساه ده عينيا اتملت دموع لما لقيته بيتكلم
بقسوة، فبررت لنفسِي_أنا مكنتش... وقبل ما أكمل
كلامي سمعت صوت زعيق، وقبل ما نستوعب
لقيت الباب بيتفتح علينا بعنف، وبابا وسميرة وأهل
سليم واقفين قدامنا، شهقت برعب واستخبيت ورا
سليم عشان محدش يشوفني بالشكل ده. وكل
اللي بعد كذا ذكريات قاسية بتمر في دماغي، شتيمة
بابا، وتهزيق أهل سليم، محاولة بابا لضربي، منع
سليم وسميرة ليه، وكلام بابا عن إنه شاف سليم
كذا مرة بيحاول يقرب ليا ويستغل إني صغيرة رغم
كده سليم محاولش يدافع عن نفسه، اتضرب
واتبهدل، ولكنه دافع عني أنا لما شاف الرعب في
عينيا، وقال إنه هو اللي خلاني آجي عنده، وآخرًا

اتتهى بكتب كتابنا السريع، ومفیش تاني يوم كان
سليم ساب البيت وسافر، من غير حتى ما يودعني،
من غير ما يقولي أي حاجة، سافر وهو شايفني
Wattp - سبب في كل أذى هو اتعرضله.. © ٢٠٢٥

"الحاضر" _يا بنتي! فوقت على صوت ندى
صاحبتي وهي بتشاوري يايديها، رمشت كذا مرة
بقاوم إني ادمع من الذكريات اللي بتطعن في قلبي.
_ ده أنتِ مكنتيش هنا خالص، سرحانة في إيه؟
_ مفیش مرهقة شوية بس _ مرهقة ولا حب جديد
في الكلية؟ غمزت بعد ما قالت جملتها، فخبطتها في
دراعاها _ حب جديد إيه أنتِ كمان وحدي الله هي دي
أشكال يتبص في وشها ضحكت على جملتي
وحاولت أجاريتها على قد ما اقدر وقعدنا نتكلم في

حاجات عن الكلية، كنت بحاول على قد ما أقدر
اشغل دماغي عنه ورغم كده مسابنيش ولا لحظة!
تفكيرى كله حواليه هو بس! لحد ما ندى قالت مرة
واحدة_أوبالا ده الظاهر في وجوه جديدة في الجامعة
اتلفت مكان ما بصّت، وللحظة بعد ما كنت بشرب
ماية شرقت وبقيت أكح لحد ما اتخنقت، لما لقيته
ركن بالعربية جنب الكافيتريا، نزل منها ورفع
نضارته الشمس، وبعدين راح طلب قهوة ووقف
يراقب المكان من حواليه. رفع إيده يعدّل من شعره
الاسود فسمعت صوت همس بنات من ورايا عن
قد إيه هو وسيم. للحظة حسيت بنار بتقيد جوايا،
وحسيت إني عايضة اخنقه وفنفس الوقت حسيت
بحزن رهيب إني زي زي البنات بتغزل فيه من بعيد

رغم إني مراته وليا حق فيه! وقفت بضيق ناوية
أخرج من المكان قبل ما أمسك في البنات اللي ورايا
واروح أكمل عليه هو كمان، كنت عارفة إنه جاي
ياخدني، بس مكنتش عايضة. حد يشوفني معاه، ولا
إني اختلط بيه ولكنه لمحني من وسطهم لما
اتحركت. اتوترت بشدة لما لقيته بيقرّب ناحيتي،
وحسيت إن الوضع هيتكشف ومش هعرف أكذب!
اصل هيكون إيه مبرري لما يشوفوني خارجة معاه؟!
ابن اللي بابا شغال عنده؟ اعتقد مش مبرر بالذات
بعد ما جذب انتباه الكل هنا والثراء اللي باين عليه!
ابتسملي ووقف جمبي، برقت برعب لما لقيتي
حاوط خصري وقربني ليه، ومال طبع قبلة على
خدي وسط نظرات الكل المصدومة اللي أولهم ندى

صاحبتني اللي مش فاهمة حاجة الحقيقة ولا أنا
فاهمة حاجة حسيت روعي اتسحبت بقربه، وما
بالك لما أعلن تملكه ليا قدام الكل كده من غير ما
احراج ولا كسوف وكإني مراته فعلاً! _مين ده يا منه؟
_ده... ده _جوزها اتكلم ببرود وهو بيشرب من
كوباية القهوة بتاعته، بصتله بصدمة وهو بيتعامل
ببرود وببيضحك نص ضحكة فظهرت غمازته، في
حين صدمة ندى مكاتتش أقل مني. بصلي وهو
بيكتم الضحك قدام عينيا المبرقة وبوقي المفتوح
بصدمة. _تحبي أجيبلك قهوة أنتِ كمان يا روعي؟
مردتش عليه وفضلت بصاله بصدمة.. _طب
نسكافيه؟ لا؟ طب يلا نروح قالها وخدني واتلفت وهو
برضه محاوط خصري وأنا من الصدمة مش قادرة

استوعب أي حاجة أنا مين؟ وازاي؟ ومين الراجل
ده؟ وماسك وسطي كده ليه؟ وإيه جوزي دي
كمان؟ اسئلة كتير وانا في صدمة وكإني مفصولة عن
الدنيا، ركبنا العربية وخرجنا من الجامعة ووصلنا
البيت كل ده وأنا على وضعي. بفتكر قربه، لمستته،
ريحته اللي غرقتني، واعترافه بعلاقتنا، مبقتش
فاهمة حاجة وهو من لحظة للتانية كان يببصلي
بطرف عينه ويكتم الضحك.. هو نفسه مكانش
فاهم عمل كده ليه بس لقي الموضوع مسلي ركن
العربية واستناني أنزل ولكني فضلت مكاني متنحة،
فضحك هو ونزل وفتح العربية ومد إيده ليا عشان
أنزل، بصيت لإيده بعدم استيعاب وبعدين رفعت
نظري لعيونه والنظرة الشقية اللي كانت فيهم

وللحظة اتحولت نظراتي للعصبية، زقيت إيديه
فبصلي باستغراب، فنزلت وزقيته مرة ثانية وأنا
بقول.. _إيه اللي بتحاول تعمله معايا ده؟ عايز
تننقم؟ جايلي الجامعة عاملي استعراض؟ كملت
بتريقة _ وتقولي تشربي قهوة يا روعي طلعت
روحك! لقيته ضحك على كلامي، فاتعصبت اكتر
وضربته كذا مرة وأنا بقول _ وإيه جوزي دي؟ ها! إيه؟
بتقولهم ليه؟ عايز تطلعني كدابة قدامهم وقدام
صاحبتي وإني مخبية عليها حاجة زي دي! أنت عايز
توصل لإيه باللي بتعمله ده؟! مسك إيدي اللي كنت
بضربه بيها وقال ببرود _ ما أنا جوزك فعلاً، كدبت
مثلاً؟ محستش بنفسي غير وأنا بزقق _ جوزي إيه
أنت مصدق نفسك! احنا جوازنا كان عرفي وعلى

ورق لإني كنت عيلة، عيلة ١٤ سنة، دلوقتي أنا ٢٠
سنة، كتبت عليا رسمي؟ لا؟ يبقي متصرفش على
الأساس ده عشان جوازنا أنا مش معترفة بيه أصلاً!
كتف إيده قدام صدره، واتكلم بطريقة_قولي كده
بقى! مستنياني أكتب عليك رسمي؟ عشان
أكملك اللعبة صح؟ وبعدين مش ذنبي إنك مش
معرفة صحابك إنك متجوزة! ولا هتقوليلهم إيه
أصلاً؟ هتقوليلهم رميت نفسي عليه ولبسته
مصيبه خلته كتب عليا في وقتها؟ بصيته بصدمة
إنه فهم معنى كلامي غلط، وفنفس الوقت قسوة
اللي قاله، اتملت عيوني بالدموع، ومحستش
بنفسي غير وأنا بضربه بعنف وأنا ببكي.. _حرام
عليك، حرام عليك كفاية بقى ليه بتتعمد تكرهني

في نفسي أكثر! كفاية بقى كفاية إني مبعرفش أبص
لنفسى في المرايا لإني سبب في شقلبة حياتك! كنت
عيلة، واللّه كنت عيلة مش فاهمة حاجة، واللّه كنت
عايزة أعمل أي حاجة عشان أبقى جنبك بس
ياريتني مت اليوم ده، ياريت بابا كان قتلني أنا مش
عارفة أعيش من تأنيب الضمير وكرهى لنفسي،
حرام عليك يا سليم، ليه توجع قلبي بالشكل ده!
مرة بهجرك، ومرة بكرهك ليا! كان واقف مكانه
متجمد، لا حاول يوقفني عن ضربه، ولا حاول
يواسيني، بطلت بكا ووقفت بصيت في عيونه بعيون
مليانة دموع ووش أحمر من البكا والانفعال، ولما
ملقتش منه رد فعل سيبته وجريت على فوق،
حسيت إن شوية وهنهار أكثر، سليم فعلاً شخصيته

اتبدلت، مبقاش حنين وبقى قاسي، جاحد، حاقد،
وكل المشاعر دي متوجهة ليا أنا بس طب ليه؟ أنا
كنت ضحية زبي زيه! طلعت على فوق ودخلت على
اوضة سميرة على طول، بصتلي باستغراب
فاتكلمت بعصبية_كنتِ مهدداه بياه؟ سابت الكتاب
اللي في إيدها وقالت بهدوء_قولتلك مش هطلع
سره، هو نفذ وأنا نفذت، مبخونش الوعود _بس
تسيبيني أنا اللي أعاني ده عادي صح؟ تسيبيه
يفضل يجلد فيا بسببك ده عادي بس متخونيش
وعدك ليه، أنا بكرهك، بكرهك وبكرهه وبكره نفسي
الله يسامحكم كلکم.. سيبتها وجريت على أوضتي،
واترميت على السرير فضلت أبكي بعنف لحد ما
روحت في النوم. وهيفضل سر سليم مش معروف،

رغم السنين دي كلها. عدى كام يوم مخرجتش
فيهم من اوضتي، كنت مطفية، وكل حاجة سودة في
وشي، حسيت بإني مخنوقة فخرجت البلكونة اشم
شوية هوا، شوية ولقيته دخل بعربيته القصر، نزل
من العربية ورفع وشه ليا، فاتقابلت عيوننا بنظرات
عتاب لوقت طويل، كل واحد فينا كان مكسور من
التاني، بس مش معروف الحواجز اللي بينا دي
هنقدر تتخطاها في يوم ولا لا.. مقدرتش أقاوم
ومنزلش ليه، وفعلًا خدت شال خفيف على كتفي
عشان نسيمات الهوا الباردة، ونزلت ليه، وكأنه كان
حاسس فلقيته واقف مستنيني فعلاً، قربت منه
بخطوات بطيئة، وقفت قدامه وفضلت باصة لعيونه
الجميلة، للحظة حسيت بدفي خارج من عيونه، دفي

مشوفتوش بقالي ٦ سنين كاملين.. رفع إيديه وشد
التوكة اللي ماسكة شعري وكنت عامله بيها كعكة
مش متناسقة، وبعدين عدله بإيده وعيونه
مفارقتنيش لحظة، وكانت لمساته لطفية بشكل!..
_ كده أحلى. كانت نبرته حنية غير معتادة ومع كل
حركة ونظرة منه، روعي كانت بتتسحب، ودقات
قلبي كانت بتعلن تمردھا، تأثيره عليا واضح جدًا..
_ بتكرهني يا سليم؟ اتنهد_ مش عارف _ بس أنا
مش عارفة أكرهك غمض عيونه بألم، وبعدين
مسك خصلة من شعري وقربها من أنفه
واستنشقها بوله، للحظة حسيت إن دي تصرفات
عاشق بس الحقيقة بتثبت العكس تصرفاته وكلامه
بيثبت إن مفيش أمل بينا! _ ليه وافقت على اللي

قالته سميرة؟ ليه دخلت في اللعبة دي؟ ليه خلتنا؟
تعذب إحنا الاتنين؟ إيه السر اللي وراك يا سليم؟
قولي وصدقني عمره ما هيطلع، بس أعرف سميرة
استغلتك إزاي ثق فيا يا سليم! قولتها برجاء وعيوني
اتملت بالدموع، كنت محتاجة أعرف فعلاً يمكن اقدر
اساعده، أو يمكن مشكلتي إني نفسي أحس إنه
واثق فيا! أو إن ليا لو حتى مكان صغير في قلبه!
شدني ليه فجأة وضمني، ضمنني بقوة، والحقيقة
كنت مستنية اللحظة دي من ٦ سنين، لفيت إيدي
حوالين رقبتة وضميته بشوق، بأخذ أكبر قدر من
ريحته وبخزنها جوايا مين عارف يمكن ميتعوضش
تالي! ولكني اتجمدت جوا حضنه لما قال.. _ احنا لازم

نتطلق.. يتبع... # تحت_التهديد #

منة_ممدوح_البنا

———— Part Break ————

"تحت التهديد" الحلقة الرابعة _متأكدة إن سليم

هو اللي طلب منك كده مش حد تاني؟ قالت والدته

الكلام ده وهي واقفة قدامي مربعة إيديها ورافعة
حاجبها بتنقل نظراتها بيني وبين سميرة وكأنها
شاقة إن ليها يد في الموضوع، ارتبكت واطرعشت وأنا
ببص بطرف عيني لسميرة اللي كانت بتهددني
بنظراتها إني لازم أقول اللي حفظتهولي وإلا كل حاجة
هتتقلب عليا، فدمعت من الموقف الوحش اللي
اتحطيت فيه من شوية وازدادت رجفة جسمي.
_أيوه، هو اللي قالي أروحله بالليل والكل نايم، وكان
بيقولي إنه بيحبني وعايز يتجوزني بس خايف منكوا
لترفضوا قولتها وانهارت في البكاء، بشكل خلاها
تصدقني من حالة الهيستريا اللي كنت فيها، ولكني
كنت في حالة هيستريا من الوضع اللي اتحطيت فيه
ومن الموقف اللي اتسببت لسليم فيه بعد ما

شوفت نتايح اللي عملناه أنا وسميرة، مكنتش
مدركة عواقب الطريق اللي مشيت فيه، ابتسمت
سميرة بانتشاء وهي شايفة خطتها ماشية زي ما
هي عايزة بالظبط. أما والدة سليم فرفعت إيديها
على دماغها وحست بصداغ رهيب من تصرفات
ابنها الطايشة. اتلفتت ناحيته وكان واقف على جنب
ساند على الحيطه بيتابعني بنظرات كارهة. خرجت
والدته من الاوضة بعد ما قالت لكل يستنوا برا
عشان تعرف تستجوبني من غير دوشة. وقبل ما
تخرج بصتله بنظرة مليانة عتاب فقابلها هو بجمود
وكإن مش فارق معاه أي حاجة غير إن المهزلة دي
تخلص بس. وبمجرد ما خرجت سمعت صوت
تسقيف من ورايا، اتلفت ولقيته بيقرب بوش جامد

تمامًا وبیسقف ببرود رهیب، بصتله بعیون حمر من
کتر العیاط.. _ هایله ممثلة هایله واللّه، عاجبني
المواهب المتعددة اللي عندك دي يا منة، ده أنا
نفسی قربت أصدقك! كانت شفایفی بتترعش
ومش عارفة أرد علیه، أما سميرة ضحكت وخبطتني
على كتفی بفخر وعیون بتلمع بجشع _ شاطرة يا
بت، جدعة تربيتي _ عاجبك الفضيحة اللي حصلت
دي يا سميرة؟ _ مكانتش هتبقى زي الفضيحة اللي
هتحصلك لما يعرفوا اللي عملته يا ابن الشهاوي
سكت تمامًا وبصلها بکره، فلحظة لقيت الباب
بيتفتح وبابا بيدخل وملامح وشه متبشرش بالخير
وبدون تردد قَرَّب مني وضربني بالقلم بعنف وقعت
على الأرض بين إیدین سليم بسببه _ لا أنتِ بنتي

ولا أنا أعرفك وخرج من الأوضة من غير كلام زيادة
بكيت مكاني، فحسيت بسليم بيرفعني بحنية. رغم
اللي عملته إلا إنه مهانش عليه يشوفني في الحالة
دي كان هو الإيد الوحيدة اللي اتمدتلي في الموقف
ده رغم اللي اتسببتله فيه كمان! بصتله بدموع
فبادلني هو بنظرة مليانة عتاب، وبعد عني وخرج
لحد ما المأذون ييجي.. "الحاضر" بعدت عنه
بصدمة وأنا بحاول استوعب كلامه، إزاي قادر
يرفعني لسابع سما وأحس إنه بيحبني إنه سليم
القديم هو اللي قدامي ما اتغيرش ولا حاجة ويرجع
تاني يخسف بيا لسابع أرض من غير رحمة! بصيت
لعيونه اللي كانت جامدة تمامًا وكأن اللي قاله ده
حاجة عادية. حاولت الاقي أي حاجة تشفع ليه في

عينيه. بس ملقتش! كان ناويها فعلاً فابتسمت بألم
وأنا حاسة إن قلبي بيتفتت للمرة المليون _ أنا من
رأيي كده برضه بصلي بصدمة من رد فعلي اللي كان
عكس ما اتوقعه فكملت _ إحنا ملناش مستقبل مع
بعض يا سليم، لو فضلنا مع بعض أكثر من كده،
هنفصل نجرح في بعض، أنتَ صح، لازم نتطلق زي
أي زوجين متحضرين شايفين إنهم مينفعوش مع
بعض رفع حاجبه بتعجب على آخر جملة، مهتمتش
وخلصت كلامي وسيبته وطلعت على فوق من غير
ما استني رده، كل الكلام اللي قولته على الرغم من
إنه حقيقة وإننا ملناش مستقبل مع بعض فعلاً، إلا
إنه كان من ورا قلبي بس عشان أرد كرامتي اللي
سليم بيخسف بيها الأرض، ورغم كده مش قادرة

أبطل أحبه برضه.. صحيت بعد ساعات قليلة من
النوم والأرق اللي اتملكني طول الليل، ده غير نوبة
العياط بعد ما اتخيلت إن خلاص الرابط اللي بيني
وبين سليم هينتهي، يعني مش هيبقى فيه أي أمل
بيننا تاني رابط؟ أنهى رابط بالظبط؟ الجوازة اللي
كانت تحت التهديد؟ مستنية إيه ما طبعي دي
كانت هتبقى نهاية اللعبة دي! وقفت قصاص مرايتي
بحاول أداري عيوني الوارمة ووشي الباهت بالميكب
ورغم إني اتفنتت فعلاً وقدرت أخفيهم ولكن
مقدرتش أخفي لمعة الحزن اللي في عينيا كنت
بحط بعملية وأنا بتجنب إني أبص لوشي اللي كان
مكروه بالنسبالي تقريبًا مش هبطل أشوف نفسي
مسخ! خرجت بخطى بطيئة، مكنتش عايزة أروح

الكلية بس كان عندي امتحان حُكم القوي! وطبعًا
إحنا عبید الدرجات وورقة الغياب نزلت تحت وأنا
بدعي إني مشوفهوش قدامي. وقفت مكاني متنحة
لما لقيت دعوتي جت بالعكس، ولقيت واقف تحت
فعلاً، ساند على عربيته، رافع نضارته الشمس على
راسه، ماسك موبايله بين إيديه وكأنه عارف إني نازلة
في الوقت ده! أول ما شافني اتعدل في وقفته،
فاتحرت بعيد عنه ناحية ما عمي سعيد واقف،
واتطمنت إنه مش هيحتكرني زي المرة اللي فاتت
ويصمم يوديني. _راحة الكلية؟ وقفت على صوته
وأنا بستغفر ربنا في سري، واتلفتله فلقيته بيقرّب
ناحيتي. _آها كان ردي بارد وبعدم اهتمام، لقيت
نظراته بتجيبني من فوق لتحت، وفلحظة حسيت

بنار غضب قادت في عيونه الحادة، ارتكبت ومبقتش
فاهمة فيه إيه وإيه سر تبدل ملامحه بالشكل ده
اتنحى وقال بتوتر مش شايفة إن الفستان ده
قصير شوية؟ رفعت حاجبي باستغراب وحسيت إني
واقفة قدام واحد عنده شيزوفرينيا في مراحل متأخرة
كمان. بصيت لفستاني الأزرق اللي كان لحد ركبتني
_ لا مش شايفة الحقيقة _ بس أنا شايف _ بسيطة
غمض عينيك رفع حاجبه _ نعم ياختي _ مش
عاجبك متبصش! كانت ردوده مستفزة، وردودي أبرد
منه غمز بعث وقال _ لا عاجبني عاجبني جدًا كمان
إزاي مبصش! بصتله بصدمة ووشي جاب ألوان من
الكسوف، ولكن اتنفضت بفزع لما اتحولت ملامحه
للغضب وصرخ بعنف _ بس ده هنا في البيت، مش

تخرجيلي بيه وتخلي اللي رايح واللي جاي يجيبك
من فوق لتحت! شايفاني مركب أرايل؟! على قد ما
قلبي وقع في رجليا من نوبة غضبه، إلا إني اتعصبت
من تحكمه اللي بدون داعي _ وأنتَ تركب أرايل
على حسابي ليه؟ ما تركب من غير ما تدخلني في
الموضوع فضلت ملامحه على نفس الوقت كإنه
بيستوعب العبث اللي أنا بقوله، الحقيقة إن ردودي
المتخلفة كانت بتبهري أنا نفسي، جز على سنانه
وغمض عينيه _ أنتَ هتتحول ولا إيه؟ شد على
عروقه أكثر _ قامباير ولا مستذئب عشان أبقى
عاملة حسابي؟ فتح عينه مرة واحدة بنظرة مرعبة
خلتني رجعت خطوتين لورا _ على فوق _ نعم؟!
زعم بحدة _ فوق غيري اللي لابساه ده حطيت أيدي

على وسطي بعند_مش مغيرة حاجة _منة!
_قولتلك مش طالعة وملكش دعوة وميخصكش
أصلًا، وأنت مالِك ألبس ضيق ألبس واسع إن شاء
الله ألبس شوال بطاطس أنتَ... صرخت بفزع لما
لقيتني أنا اللي اتشالت زي شوال البطاطس،
خبطت رجلي في الهوا _أنتَ يا همجي يا متخلف،
نزلني! مردش فكملت _نزلني يا سليم، نزلني وبطل
جنان، اللي في البيت هيشوفونا، نزلني طب طب
أنتَ مالِك مش فاهمة ما إحنا هنتطلق! وصلنا لباب
الشقة، فتح الباب من المفتاح اللي برا، وحدفني
على الكنبه بعنف _ولحد ما نتطلق تسمعي كلامي
زي أي زوجين متحضرين يا مراقي! عرفت إنه بيتريق
على اللي قولته امبارح، غريبة! كان مستنيني أقول

إيه يعني! اتوسله إنه ميسبنيش على حساب
كرامتي؟! فتحت بوقي عشان أعارض فقطاعني
_ ادخلي غيري هدومك يا مفيش جامعة دببت على
الأرض وأنا كلي غيظ من تصرفاته اللي ملهاش
علاقة ببعض دخلت أوضتي وقفلت الباب ورايا
بعنف اللي يشوفه بالشكل ده يقول غيران! هزيت
راسي بـ لا سليم بينتقم بس من اللي حصله زمان
بيتحكم وييفرض سيطرته عليا بس! _ مش مغيرة يا
سليم واللي عندك اعمله! هدوء ملئ المكان
وصمت غريب، بعدها سمعت صوت باب الشقة
بيتقفل بعنف، اتنفست براحة وفتحت الباب ببطء
أشوفه مشي فعلا ولا لأ، وفجأة لقيت الباب بيتزق
بعنف، صرخت بفزع وأنا بدفع الباب بحاول أقفله

وهو بيزقه وبيفتحه _بتعمل إيه يا متخلف!
_هوريكى اللي هقدر أعمله وطبعًا لإن في فرق قوة
وأجسام، قدر سليم بزقة عنيفة إنه يفتح الباب،
ودخل وعينيه بتدق شرار حرفيًا، وقعت على الأرض
من قوة زقة الباب، فوقف قدامي ومسكني من
طرف الفستان من عند كتفي، وشدني لدرجة إني
اترفعت من على الأرض، كان شبه اللي ماسك
حرامي غسيل حرفيًا! _إيدك يا سليم قولتها وأنا
بضربه، فهزني بعنف كذا مرة_ أنتِ مبتسمعيش
الكلام ليه ها! العند بيجري في دمك؟ فاكدة نفسك
استرونج اندبندنت وومن يا روح أمك! _إيدك
والفستان يلا! رفع حاجبه بدهشة_يلا! ده أنتِ يومك
أزرق، أومال لو مكنتيش عاملة زي القولة! كان بيhez

فيا بعنف، ففضلت أضرب على إيده وأنا بصرخ_أنا
شبه القولة يا أعمي البصر والبصيرة! هقول إيه ما
أنت لا بتشوف ولا بتحس! ابعد عني، وهدومي مش
مغيراها برضه، فوق يا عينيا أنا مراتك على الورق
بس يعني ملكش إنك تتحكم فيا! للحظة لقيته
سابني، بصتله باستغراب فلقيت عيونه بتلمع
بعث قرب مني لدرجة مهلكة وقال بنبرة كانت
نيتها مش سليمة خالص_يعني أنت مشكلتك إن
جوازنا على الورق؟ مش مشكلة نخليها فعلي.. قالها
وهو بيقرب مني أكثر، برقت برعب لما استوعبت
مقصده من كلامه، وفلحظة جريت على الحمام
قفلته عليا وأنا بصرخ_لا! خلاص خلاص هغير أم
الفرستان! حسبي الله ونعم الوكيل فيك يا ابن نادية

_ما كان من الأول! مع إني كنت اتمنى، وبعدين
مفيش غيري أنا وأنتِ والشيطان شاطر بصراحة!
وأهو نكمل اللعبة سندات على الباب وأنا بنهج
برعب_ اتربي يا سليم! ضحك وخرج من الأوضة
ومنها لبرا الشقة خالص، بيهددني! عايز يكسر عيني
بس! مش قابل يشوفني وأنا بعارضه! بس أنا
استحالة انفذ كلامه حتى لو فيها خناقة تفرج علينا
القصر واللي فيه وحتى لو هددني بوقاحته دي!
فتحت الباب براحة فملقتهوش فعلاً نزلت لتحت
واتسحبت بشوفه فلقيته خد عربيته ومشى زفرت
براحة وابتسمت _يا انا يا أنتَ يا ابن الشهاوي..
_يعني إيه، أنا مش فاهمة حاجة! زفرت بنفاز
صبر_يعني أفهمك إيه أكثر ما فهمتك؟! _ما هو ده

مش سبب فعلاً بصراحة يا منة، يعني إيه كتب
عليكي عشان أنتِ البنت الوحيدة اللي في البيت؟!
هربت بعنيا منها، طبعًا مكنتش هقدر أقولها عن
السبب الحقيقي لجوازي منه، مش هقدر اخسر
احترامها ليا زي مانا خسرتة لنفسي. _أهو اللي
حصل بقى يا ندى مسكت إيدي وعينيها بتلمع_ مع
إنه سبب ميدخلش دماغ عيل في ابتدائي وأنا متأكدة
إنك مخبية حاجة، بس مش مهم، ده أنتِ بايضا لك
في القفص يا بنت المحظوظة! _بس بالله، إحنا زي
الأعداء أصلًا دلوقتي، بيعاملني كضرتة مش مراته
_بس في الأول والآخر أنتِ مرات الحتة أم غمازات
اللي قلبت الدنيا هنا! نغزتها في دراعها والغيرة
اتملكنتني_ ما تلمي نفسك يا ام عين زايغة وكملت

بتوتر_أساسًا مش عارفة هروح البيت ازاى، تخيلي
لو شافني مغيرتش اللبس اللي عمل عليه حوار
هيعمل إيه! _ ليه أتخيل، ما أنا هشوفه عملي
دلوقتي بصتلها باستغراب ومفهمتش اللي هي
قالته، لقيتها باصة لورا، لوهلة عرفت اللي فيها،
هزيت راسي بـ لاء، فحركت هي راسها بـ آه بتأكدي،
بلعت ريقى بتوتر وحسيت إن قلبي وقع في رجلي،
فالتفت ببطيء وأنا بدعي إن اللي في دماغي
ميكونش صح. وطبعًا زي كل مرة بتيجي بالعكس
لقيته واقف ورا ساند على مقدمة عربيته، ومربع
إيديه، وأول ما اتلفتله رفع نضارته ولمحت نظرة
توعده فيها _ أنا بقول نجري؟ _ يُستحسن برضه...
يتبع... # تحت_التهديد # منة_ممدوح_البناء

———— Part Break ————

▮ تفاعلوا طيب عشان انزل باقي الحلقات

———— Part Break ————

أنت تقرأ حدوتة "رواية" بالعامية المصرية، بتتكلم
عن بنت خدعت شاب وخلته يتجوزها، وبعد سنين
رجع من السفر، يا ترى هيتصرف معاها إزاي؟ وإيه

اللي جابره على الجوازة دي؟! هيتطلقوا ولا هيكملوا
سوا! تحت التهديد للكاتبه منة ممدوح البنا كل يوم
تحت التهديد" الحلقة الخامسة _ على " □ حلقة
فين يا روعي؟ قال جملته لما قومت وقفت ناوية
أجري فعلاً ما أنا مضمنش الحقيقة ممكن يعمل
إيه بعد ما شوفت نظرة الشر في عينيه حط إيد
على كتفي وزقني قعدني تاني بعنف، فارتبكت_أنا؟
هز راسه بآه وعلى وشه ابتسامة مرعبة _أنا.. ده أنا
طلع عندي محاضرة مهمة جدًّا جدًّا ولازم أروحها
دلوقتي، مش كده يا ندى؟ هزت راسها بتجاريني
من غير ما تتكلم وهي بتكتم الضحك جواها وقفت
على طول بعد جملتها وأنا بتحاشى إني أبص لوشه
عشان ما اتخضش اكتر، وزى ما عملها قبل كده

حاوط خصري بتملك ومال ناحيتي وهو بيهمس
بنبرة مرعبة_هتيجي معايا بما يرضي الله ولا
أشيلك زي شوال البطاطس تاني بما لا يرضي الله
وتبقى فضيحتك بجلاجل؟ بلغت ريقى بتوتر
واتكلمت بسرعة_ياااه ده المحاضرة اتلغت، صح يا
ندى؟ ده أنا كنت ناسية خالص، العتب على السن
بقى مش تفكريني برضه! ابتسم ل ندى واتكلم
بلباقة مشوفتهاش منه قبل كده_معلش هضطر
أخذها منك، أصل وانا مشوار مهم جدًا بصلته
باستغراب_إحنا وانا مشوار مهم؟ فلحظة لقيت
إيده بتغرز في جمبي، فصرخت بألم، بصتلي ندى
بتعجب فاتكلمت بسرعة_آآآه آه فعلاً يا خبر ده إحنا
ورانا مشوار مهم جدًا جدًا معلش نسييت، العتب

على السن بقى شوفته بيحاول يكتم ضحكته
بالعافية لدرجة إنه دور وشه الناحية الثانية، بصتله
بغيط وفي الخبائة دوست على رجله بقوة، ابتسمت
بانتصار لما شوفته معالم وشه بتتبدل للألم، وبدون
تردد غرز إيده مرة ثانية، فضربته بعنف في جمبه
بصلي بنظرات بتدق شرار فابتسمتله وأنا بلاعب
حواجبي _ وحيات أمك لأعلقك على باب البيت
وأخلى اللي رايح واللي جاي يحدفك بالطوب طبعًا
كلامه ده كان بهمس، بس لو حد ركز معنا كان
لاحظ الخناقة اللي كانت بينا كانت حرب باردة حرفيًا!
_ اتكلم على قدك _ برضه؟ أنا بقول نخليها فعلي
فعلاً فهمت قصده الوقح، فخبطته مرة ثانية بعنف
أكثر في جنبه خلته يضم شفایفه وهو يبيعد بألم،

وقولت ببراءة مصطنعة_سوري يا روعي كنت عايزة
اتأكد موبايلي في الشنطة ولا لأ_ده أنا هطلع روك
النهادة! وقبل ما نكمل خناق لقيت زميل من
زمايل الكلية بينادي عليا، اتلفتنا كلنا على صوته في
حين سليم كان بيوصله من فوق لتحت وهو رافع
حاجبه بتعجب_ممكن تبقي تبعتي لي الفايل بتاع
البريزنتيشن، لأنه اتمسح من عندك لما عملت
سوفت لموبايلي_يا عين امك! قالها سليم بتريقة،
فحاولت اشوشر قبل ما ياخذ باله_آه آه طبعًا أكيد
_شكرًا يا منة بالمناسبة، الفستان تحفة عليك
بصيت لسليم برعب فبادلني هو بنظرات كانت
بتدق شرار، حسيته بيتخيل أقسى أنواع التعذيب
ليا، وقال بلهجة مريبة_آه فعلاً تحفة عليها ولا أنتِ

إيه رأيك؟ _ أنا عامّةً في المواقف اللي زي دي أحب
اسمع سامو زين جدًّا.. _ استني بتهربي ليه؟! نزلت
من العربية فنزل ورايا، اتعصبت اكر من كلامه،
فروحت ناحيته وزعقت بصوت عالي _ أنا مش قادرة
أفهم دماغك، أنت مالك بيا؟ مالك ألبس إيه ولا
أهيب إيه حتى بتدخل ليه؟! حصّلت إنك تيجي
تهددني في الجامعة كمان! _ صوتك _ هو إيه اللي
صوتك، أنت مصدق نفسك باللي بتعمله ده؟
مصدق لعبة الزوج المتحكم الغيران اللي قومتلي
بيها؟ فوق يا سليم لا أنت عمرك كنت جوزي ولا أنا
كنت مراتك، ولا ما صدقت تلاقي لعبة تتسلى فيها!
عروقه نبضت بعنف ووشه احمر _ أنت مفيش على
لسانك غير الكلمتين اللي حافظاهوملي دول؟! ده

على أساس إني كنت أنا اللي عاشق ولهان وهموت
واتجوزك، مش كلها لعبة منك! شديت على شعري
بجنون من العصبية _ قولتلك أنا كنت ضحية زي
زيك، ليه مصمم تعلقلي شماعة الموضوع؟!
قدامك سميرة أهى روح قولها الكلمتين دول في
وشها، قولها هي السبب، قولها هي اللي استغلت
غبائي، ويا عالم ماسكة عليك إيه، يا عالم عملة إيه
اللي خلتك ساكت على الظلم اللي اتعرضتله لحد
دلوقتي يا سليم! حسيت بوشه انكمش بألم، بصتله
باستغراب، فمن الواضح إن فيه مصيبة كان واقع
فيها واستغلتها سميرة فعلاً، ولكنه قدر يخفي الألم
اللي على وشه ببراعة وقال _ متنكريش إنك ليكي
دور في اللي حصل، جشعك وطمعك في الفلوس

والجاء، وأهو اتحقق فعلا يا منة، لعبتك ماشية زي
الفل، أدكي متجوزاني، عندك عربية بتوديكي
وتجيبك من الكلية، وعايشة في دور خاص بيكي،
وطلباتك كلها مجابة، متمثيلش إنك زعلانة عشان
مش لايق عليكي الدور ده! ملامحي اتبدلت
للصدمة، حسيت بغصة في قلبي من كلامه القاسي
اللي بيتعمد يضربه في وشي، كإنه بيتعمد يوجعني!
_كفاية بقى كفاية! أنا خلاص لا عايضة فلوس، ولا
عربيات ولا كل الماديات دي، أنا اكتفيت! سكت
شوية، ودمعت بألم _عارف؟ ولا حتى بقيت عايزاك
أنت كمان يا سليم! طلعوا اللي جوا على صوت
الدوشة، سميرة وبابا ووالدة سليم اللي اتكلمت
وهي بتبصلي من فوق لتحت _فيه إيه يا سليم؟

بصتله هو اللي كانت ساكت وجامد تمامًا، ووجهت
كلامي ليها وأنا لسة عيني عليه _ مفيش يا نادية
هانم أظن سليم صلّح غلطته اللي عملها في حقي
واستغلّاله لجهلي من سنين فاتت، متهيألي لازم
الموضوع ينتهي بقى لأنه بوخ وطول أوي بصلي
وعيونيه وسعت بصدمة، معرفش ليه أنا قولت كده
وثبت الموضوع عليه أكثر بدل ما أصلحه، ولكني
كنت عايزة ادوقه من نفس الكاس اللي عمال
يدوقهولي من زمان، كنت عايزاه يجرب الوجع اللي
بحس بيه من كلامه القاسي اللي بيضربني في
مقتل وألاقيني عاجزة إني أدافع عن نفسي قدامه،
نظراته اتبدلت لمشاعر مختلطة، عتاب وحققد، وحزن
طفيف لمحته من بعيد، حسيت بغصة من نظرتة

الأخيرة وكأنه يقول لي بتعملي فيا كده! بس مين
اللي بيوجع الثاني؟ هو بدأ والبادي أظلم اتكلمت
والدته_وأنتِ فكرك إن إحنا اللي مغرمين بإنك
تبقي مرات ابني؟ لولا العشرة ولولا والدك ومكانته
العزيزة علينا مكناش سترنا عليكِ وخليناكي تطول
تبقي مرات سليم ضميت شفايفي بألم وأنا لسة
بصاله بعيون مليانة دموع_وأنا خلاص مبقتش
عايزة أطول، ياريت نخلص الموضوع ده بسرعة
قربت مني سميرة، واللي وشها اتبدل للغضب،
مسكت دراعي ومالت ناحيتي وهي بتقول من بين
سنانها_أنتِ اتهبلتي ولا إيه يا منة، بتعملي إيه يا
غبية؟ شديت دراعي من بين إيديها بعنف
استغربته هي ومعلقتش لانها أدركت بإني مش في

حالتي الطبيعية اتكلم بابا بغضب_وهو بمزاجك يا
بت؟ إن كان سليم غلطان قيراط فأنتِ غلطانة اربعة
وعشرين قيراط، ولو عليا كنت دفنتك، بس اللي
منعني سليم اللي أنتِ واقفة قدامه وأمه اللي
بتبجحي في وشها! ابتسمت بألم_ياريتك كنت
دفنتني وقتها يا بابا، كان أهون من اللي أنا عايشاه
الجو كان مشحون، فيه كلام كثير، وهمهمات، فقالت
والدة سليم_أنا من رأيي الموضوع ده لازم ينتهي
فعلاً، على الأقل عشان يقدر سليم يعيش حياته
بشكل طبيعي وهو مش مربوط بغلطة عملها وهو
شاب طايش، جه الوقت إنه يقدر يختار بنفسه
البنت اللي عايز يكمل معاها حياته. غمضت عيني
وحسيت بوجع رهيب اتملك مني لما اتخيلت إن

سليم ممكن يكون مع واحدة غيري، كنت عايزة
اصرخ وارفض، ولكن كل ده باختياري، أنا اللي بدأت،
فاتحمل نتيجة أفعالي.. اتكلم بابا_أيوه بس لازم
يكتب عليها رسمي وبعدين يطلقها، عشان حتى
يبقى الاسم مطلقة بدل العقد العرفي ده، ومفيش
حاجة تمسها أيده والدته سليم_خلاص بمجرد ما
والد سليم يرجع هنفتح معاه الموضوع، والمأذون
اللي هيكتب رسمي هو هو اللي هيطلقهم في نفس
الوقت، أنا بعمل كل ده علشانك أنت بس يا ناجي،
لو مكانش فيه بينك وبين الشهاوي الكبير عشرة
وعيش وملح، مكانش عملنا كل ده. اتدخلت سميرة
اللي حسنت كل خطتها بتتهد قدام عينيها_أيوه
بس... _مبسش يا سميرة، آن الأوان الولاد يعيشوا

حياتهم كل ده كان عيني عليه هو، كإني كنت
بتوسله، بقوله ميعملش فيا كده، ميبعدنيش عنه
تاني وإني ما صدقت رجعت أشوفه قدامي تاني بعد
سنين، وهو كانت نظراته جامدة، مثبتة عليا من غير
أي مشاعر، وبعد وقت اتكلم هو أخيرًا _ أنا هكتب
رسمي... بس طلاق مش هطلق برقت بصدمة إن
هو اللي طلب كده، منعت على قد ما اقدر اني
ابتسم، بس مقدرتش اداري الفرحة اللي كانت
جوايا، حسيت إن قلبي بيرقص من الفرحة، حسيت
إنه ممكن لوهلة يكون عايزني فعلا، وإن مكنش كده
هيورط نفسه ليه من البداية _ إيه اللي بتقوله ده
بس يا سليم _ لو سمحتِ يا ماما، خليني على
راحتي، أعتقد إني بقيت كبير كفاية إن اقرر همشي

حياتي ازاي! نظراته اتبدلت، ضيقت عينيها باستغراب،
وبصيت مكان ما بص، وانطفت فرحتي لما لقيت
عينه على سميرة اللي كانت بتهدده بنظراتها، رجع
احساسني بالوجع تاني وعرفت إنه عمل كل ده بس
عشان سميرة متكشفش سره حسيت إن كل حاجة
بنيتها في خيالي اتهدت من حواليا همس كتير وكلام
أكثر اعتراضات وآراء مكنتش مركزة ولا سامعة أي
حاجة منهم، مكنتش مركزة غير عليه الكل مشي
وسابونا احنا الاتنين واقفين زي ما احنا قصاد بعض
كانت نظراته غامضة ومظلمة مش مفهوم إيه وراها
قطع الصمت لما قال_للحظة كنت هصدق إنك
بريئة، بس من غبائك قدرتِ تكشفني نفسك من
دلوقتي ضميري مات من ناحيتك يا منة خلص

كلامه ومشى من غير أي كلمة زيادة، سابني وقلي
بيتفتت ميت حته وراه، وعرفت وقتها إن فيه حاجة
اتكسرت بينا مش هترجع ثاني والمسافات بينا بتكبر
أكثر مع الوقت والحواجز بقت أقوى مننا..

محاولناش نواجه بعض لفترة، كل واحد فينا كان
مجروح من الثاني بس يا ترى جرح مين أكبر؟ ولا
إحنا الاثنين مجروحين بنفس القدر! بس في النهاية
إحنا الاثنين وقعنا ضحايا لسميرة وجشعها..

مبكرش غلطي بس يمكن قلة خبرتي تشفعلي
شوية! يمكن ندمي وكرهي لنفسي يهون غلطتي!
وحشني؟ مش هنكر، في الأول والآخر ده سليم،

الراجل الوحيد اللي قلبي وعقلي اتفقوا عليه، رغم
كلامه القاسي إلا إني لقياله مبرر. حظيت شال على

كتفي ونزلت وقفت تحت قدام النافورة والورد، كان
فيه نسيم هوا بارد ولكنه كان لذيذ وحساه كان
بيطبطب عليا. واقفة ببص للسما والقمر اللي كان
كامل تمامًا شوفت باب القصر بيتفتح ويبدل منه
بعربيته، نزل وهو عينه عليا حسيت إنه بيقدم رجل
ويبرجع الثانية متردد! كإنه في صراع بين حاجتين
جواه أو يمكن قلبه وعقله؟ ولكن في النهاية سابني
ودخل، فابتسمت بحزن كنت متوقعة إيه مثلاً؟
هيجري عليا ياخدني في حضنه ويقول وحشتيني يا
مراي يا حبيبتي؟! كل ما بنقرب خطوة بنرجع عشرة
كل ما بنهد طوبة من السورة اللي بينا بيتبني مكانها
سدا! عدى وقت قليل فحسيت بخطوات ورايا
ابتسمت لما وصلتني ريحة برفانه اللي بقدر أميزها

من على بُعد ولكن متحركتش وفضلت زي ما أنا
وقف جمبي وخط إيدته في جيوب بنطلونه الاسود
وبص قدامه بتوهان مقدرتش أمنع نفسي وبصتله
وأنا بتأمل ملامحه اللي بقيت مهووسة بيها
بصمت.. _تفتكري مين هيفوز في نهاية الصراع بين
القلب والعقل؟ سكت شوية وحسيت إني فهمت
اللي يقصده _مفيش فايز _يعني؟ _الصراع
هيفضل داير طول ما أنتَ معرفتش تاخذ قرار وأظن
مش هتقدر تاخذ قرار، لإن الأكيد الاتنين عايزين
حاجتين عكس بعض تمامًا، وواحد فيهم هيتألم لو
نفذ اللي الثاني عايزه، فبالتالي الصراع هيفضل
شغال. اتعدل وبصلي وهو بيقول باهتمام_ وإيه
الحاجتين اللي عقلك وقلبك بيتخانقوا عليها؟

اتلفتله أنا كمان، وبعيون لامعة رديت _ عقلي عايزني
أسيب كل حاجة وأمشي، اروح فين؟ مش عارفة
بس المهم اني ابعد عن كل حاجة _ وقلبك؟
ابتسمت بآلم وقربت منه _ قلبي عايزني أفضل هنا،
جمب سليم... جمبك أخذت نفس عميق وطلعه
على مراحل، للحظة حسيت عيونه لمعت بشرارة
كنت بتمنى إنها تكون حقيقية ورغم التردد اللي
كان باين عليه، تردد يقرب ولا يبعد، إلا إنه قال
بقسوة_ أنتِ قولتيها قبل كده، إحنا ملناش مستقبل
مع بعض قالها واتلفت ونوى يمشي، ولكنه وقف
لما صرخت بآلم_ ولما ملناش مستقبل مش عايز
تطلقني ليه؟ رفع كتفه ببساطة كإنه بيقولني إني
عارفة السبب كويس وقفت مكاني ببصله بصدمة،

كان عندي أمل إن يحصل العكس، إنه حتى يقولي
إن فيه جزء جواه عايزني حتى لو بيقاومه، ولكن
سليم كان بيتفنن في كسري كل مرة محستش
بنفسي غير وأنا بخبط بإيدي تمثال محطوط على
النافورة وبصرخ بعنف، لدرجة إن إيدي ازرقّت جدّا،
ولكن إيدي كان ألمها أخف من جرح قلبي! اتلفت
هو بخضة مقدرش يداريها وشافني قاعدة على
الأرض ببكي بشدة، وبلهفة مشوفتهاش منه من
زمان، جري عليا وخدني في حضنه! يتبع... #
- تحت_التهديد # منة_ممدوح_البنا © ٢٠٢٥

Wattp

———— Part Break ————

"تحت التهديد" الحلقة السادسة _ابعد قولتها
بضعف وأنا بزقه بقوة، حسيت إني اكتفيت من كل
اللي بيحصل ده، اكتفيت من تصرفاته المتناقضة
اللي كلها عكس بعض، شوية احس إنه بيحبني بس
الماضي واقف عائق قدامنا، وشوية أحس إنه
مبيكرهش قدي! مسمعش كلامي وشد من
ضمي، فرجعت ازقه بكل قوة كانت موجودة عندي
في الوقت ده _قولتلك ابعد يا سليم! قدرت اخلص
نفسي من بين ايديه، ففضل قاعد مكانه باصلي
بنظرات غريبة، كانه كان بيتعذب، بس قررت إني
مش هفضل أديله مبرر كل شوية على حساب
نفسي! _ابعد عني بقى يا سليم! أنا مبقتش

فاهماك، أنتَ عايز إيه مني بالضبط! مرة ترفعني
لسابع سما، وتسببني طايرة واتفاجيء بيا بقع
لسابع أرض! بس أنا مش هفضل استحمل كل ده،
أنا اكتفيت اتحاملت على نفسي ووقفت، فوقف
هو كمان _ أنتَ نفسك مش عارف أنتَ عايز إيه بس
وقت ما تعرف، متجيش ليا، لإني مش هفضل
مستنيك لحد ما تعطف عليا وعلى قلبي الموجوع،
هشيلك من حياي يا سليم! وشه احمر، وعيونه
كانت اكتر، كان بيتعذب فعلاً وأنا شايفة كل ده، بس
كان لازم اللعبة دي تخلص! سيبتة ونويت أمشي،
مسكني قبل ما اعدي من جمبه، وشاور بعينه على
إيدي الزرقة والوارمة وبصوت ضعيف _ إيدك...
_ وجعها أهون من اللي حساه في قلبي نفضت إيده

عني، وطلعت لفوق ومتلفتش أبصله حتى عشان
مضعفش قصاد عيونه فضل هو متابعني وأنا
ماشية، اتنهد بالم وقعد على حافة النافورة وهو
دفن وشه بين ايديه بهم مبقتش عارفة هل بعد كل
اللي بيحصل بينا ده لسة فيه أمل بينا ولا لا! .. حالياً
مبنعملش حاجة غير إننا نجرح في بعض مبيهونش
عليا أنا اللي بتألم قصاد قصاد كل نظرة وجع في
عينيه بالضعف بس هو يجبرني بتصرفاته للأسف.
ولكن هل أنا فعلاً هقدر أشيله من حياتي زي ما
قولت؟ أعتقد لأ سليم حبه اللي جوايا أقوى مني
أقوى من إني اتخطاه.. مجاليش نوم خالص، فضلت
نايمة على السرير باصة للسقف لفترة طويلة،
ومكنتش ببكي! كإني استنفزت كل دموعي على

نفس الحاجة لسنين طويلة بس اللي عرفته إن لازم
كل حاجة تخلص ولازم السر اللي متداري يتعرف
اعتقد كفاية لحد كده اللعبة تخلص قبل ما نكره
بعض أو بمعنى أصح قبل ما أكرهه! كرهى لسليم
هيبقى عظيم بمقدار حبي ليه مش عايزة يبجي
اليوم اللي اتمناله فيه الأذى! كانت الساعة بقت ٣
الفجر تقريبًا اتعدلت وأنا باصة قدامي بشرود وبفكر
في حل، حل أنا اتأخرت فيه أوي بس هو اللي سابني
وسافر! سابني من غير ما يودعني أو حتى يسمع
مبرراتي! سابني من غير ما نقدر نتصرف مع بعض!
يمكن كان يبقى فيه أمل بينا وقتها يمكن كنا طلعنا
إحنا الاثنين بأقل الخسائر بس هو استعجل في
البُعد.. قومت اتسحبت وفتحت أوضة سميرة واللي

كان لحظي راحت زيارة لأهلها هي وبابا وهيجوا بكرا
فضلت أدور في كل الأدراج، وتحت السرير، بس
ملقتش حاجة تفيدني، اتجهت لدولاب هدومها،
فلقيت درج صغيرة في الآخر، فتحتة ولكنه مكانش
فيه حاجة مهمة غير مفتاح عتيق صغير باللون
الذهبي. قفلت الدولاب بعنف ووقفت أشد في
شعري وأنا حاسة إني خلاص بقيت على مشارف
الجنون. وفعلاً قررت أعمل حاجة مجنونة وهي إني
أدخل القصر اللي بقالي سنين طويلة مدخلتوش. أو
بمعنى أصح محرم عليا! اتسحبت لجوا على أطراف
صوابعي وأنا بتلفت حواليا وبرتجف من الخوف لحد
يشوفني ووقتها هتكون كارثة فعلاً لإني ممنوع إني
آجي هنا خالص. المكان كان هادي وضوء خفيف

بس هو اللي منور الطريق كنت عارفة خطواتي
كويس، واتجهت للأوضة القديمة اللي كنا قاعدين
فيها في القصر، دخلتها وأنا بتأمل أثارها، كانت نضيفة
ومفيهاش أي تراب ومحافظين عليها وكيانها
مسكونة لوهلة رجعتلي كل ذكرياتي اللي عيشتها
هنا وابتدلت نظراتي للحزن، بس هزيت راسي عشان
انفض الذكريات دي عني لإن ده مش وقتها فضلت
أدور في الأدراج برضه وفي كل مكان في الأوضة إني
ألاقي حاجة مفيدة؟ ملقتش قعدت على السرير وأنا
ملامي كلها يأس، الظاهر إن سميرة حويطة حبتين
تلاتة، بس كنت متأكدة إنها ماسكة دليل مادي على
سليم، لإن لو غير كده كان كدّبها مثلا أو مهموش
وقدر يطلع من الموضوع بدل ما هو بقاله ٦ سنين

خاضع ليها لعبت في شعري وأنا بحاول افكر أي
حاجة ممكن تفيدني، ولو هلة اتنفضت مرة واحدة
وافكرت الأوضة اللي في البدروم اللي كانت سميرة
بتحط فيها حاجاتها القديمة زي أثاث شقتها
القديمة قبل ما تتطلق، ومكانش فيه أي حد
بيخطي الأوضة دي غير هي بس! سميرة واخدة
سلطة فعلاً هنا أكبر من حجمها بكتير! خرجت من
الأوضة بسرعة ونزلت لتحت، كان المكان ضلمة
شوية، لحد ما لقيت نفسي قصاد باب عتيق،
حاولت أفتحه بس كان مقفول لمحت صندوق
متعلق في الحيطه، شيلته فلقيت فيه المفتاح،
فتحت الباب ودخلت على عكس باقي القصر كان
مترب شوية ومليان أثاث وانتيكات قديمة زفرت

بضيق وحركت إيدي قدام وشي من ريحة الكتمة
اللي في المكان وبدأت أدور في كل ركن وكل حته في
الأوضة، لحد ما لقيت صندوق كبير تحت أثاث
ومفارش، شيلت الحاجات منه وأنا كلي خوف إني
اتقفش أو حد يحس بيا.. فتحت الصندوق ودورت
في الحاجات اللي فيها، فشوفت صندوق صغير
خالص محطوط تحت الحاجات وكأنها بتأمن عليه
مسكته وأنا بتفحصه باستغراب، وجيت افتحه
مفتحش! حدفته بغيظ وأنا بزفر بنفاذ صبر وقلة
حيلة، وقعدت مكاني وأنا حاسة إني مش هقدر
استفاد حاجة من اللي بعمله ولوهلة افكرت
المفتاح العتيق اللي لقيته فوق في أوضة سميرة،
ومن شكل الصندوق عرفت إنه مفتاحه رجعت

جريت خدته، وعدلت كل حاجة مكانها، وخرجت من
الاولضة _ مين اللي هنا؟ شهقت برعب ورجعت لجوا
تاني وقفلت على نفسي الباب بعد ما سمعت
صوت نادية هانم من برا ولحسن حظي قبل ما
أقفل الاولضة الظاهر إن أنا نسيت نفسي وأنا بدور
وعملت دوشة _ أنتِ جيتي يا سميرة؟ قربت ناحية
الباب فسندت على الحيلة وأنا حاطة إيدي على
بوقي ومبرقة برعب فتحت الباب ودخلت بصت في
المكان بتعجب وأنا واقفة وراها بحاول أمنع النفس
اللي بتنفسه حتى _ غريبة هزت كتفها بقله حيلة
وخرجت مرة ثانية، وقتها سمحت لنفسي إني بس
أقدر اتنفس بشكل طبيعي حطيت إيدي على قلبي
وأنا بتنفس بعنف، نادية هانم مبتحبنيش. ممكن

توصل لدرجة إنها بتكرهني وهي بنفسها اللي كان
أول شرط من شروطها إني مدخلش القصر أبداً
وطول السنين دي كنت بحاول محتكش بيها على
قد ما أقدر عشان مجربش أذاها استنيت شوية
اتأكد إنها بعدت، وبعدين خرجت على أطراف
صوابعي، قفلت الباب بهدوء ورجعت المفتاح في
العلبة تاني، وطلعت من البدروم وأنا بتسند على
الحيطان وبتأكد فيه حد برا ولا لا ولما اتأكدت من
خلو المكان اتسحبت وخرجت برا القصر بسرعة
ورجعت طلعت على الدور بتاعي، دخلت جيبت
المفتاح من أوضة سميرة على طول، ورجعت
أوضتي وأنا حاسة إني فعلاً هلاقي حاجة. فتحت
الصندوق، وبصيت للي موجود باستغراب، كانت..

فلاشة! سميرة عاينة فلاشة في صندوق ليه؟ فضولي
جانبني أعرف محتواها وسبب إن سميرة مأمنة عليها
للدرجة دي. جيبت اللاب توب بتاعي، ووصلت
الفلاشة فيه فظهرلي ملف فيديو، فتحته وأنا كلي
استغراب.. وكل ما كان الفيديو يتقدم كانت ملامحي
تتبدل للصدمة، حطيت إيدي على بوقي وأنا برتجف
وبمنع نفسي إني أصرخ، ودموعي خدت مجراها من
غير ما أقدر اتحكم فيها كان موجود فيه سليم!
ومش لوحده، هو ومجموعة شباب، قاعدين في شقة
من شكلها باين عليها مشبوهة! كان شكلها مريب
وكانت بالفعل قاعدة مشبوهة، مليانة مخدرات
ودخان كثيف من كتر السجاير الممنوعة اللي كانوا
بيشربوها ومن ضمنهم شباب كانوا بيشموا بودرة!

كان وضع مقزز بالمعنى الحرفي، مكنتش اتخيل إنه
كان بالوضع المقرف ده! ولقيت سليم بيتكلم مع
واحد، وبعدها ملاله حقنة مليانة بسائل معين،
وابتدى يدخلها في وريد الشخص اللي جنبه وهما
بيضحكوا بطريقة غريبة وكأنهم مكانوش حاسين
بالدنيا وفلحظات ابتدى الشخص ده يتشنج، ومال
على اللي جنبه وهو قاطع النفس! اتقلب الفيديو
لدوشة، كلهم باين عليهم انهم بيصوتوا، سليم
بيخبط على دماغه بعنف وهو مش مصدق
وبيعيط، مش مصدق إنه اتسبب في قتل واحد!
الشباب بيلفوا حوالين بعض وهما مش في وعيهم
عقلهم مش مستوعب إيه بيحصل ولا حتى قادرين
يفكروا! سليم بيهز في الراجل وهو بيصرخ شوية

انهيارات ولوم وخنق لدرجة إنهم ضربوا بعض،
وبعدين وقفوا وابتدوا يفكروا وفلحظة لقيتهم بدأوا
ينضفوا كل حاجة حواليتهم، ويمسحوا المكان من
أي اثر موجود ليهم، وبعدين سابوه وخرجوا! كل ما
كان الفيديو بيتقدم كنت بحس بنفسي بيضيق،
كإني بغرق، مش قادرة اتخيل إن سليم كان بالقذارة
دي! كنت عارفة إنه كان شاب طايش وهو صغير
بس مش للدرجة دي! كان بيتحكي عن تصرفاته
قدامي بس عمري ما صدقت ما صدقت غير
الصورة اللي سابها لي ومصدقتش غير معاملته ليا
اللي كانت بريئة ونقية! الكارثة كارنتين شربه
للمخدرات وتسببه في قتل واحد! ده السر اللي
سميرة كانت ماسكاه عليه ومخلياه خاضع ليها من

غير تردد! ده السر اللي اتسبب في عذابي أنا وهو!
جرحنا في بعض وكل واحد كان بيتفنن في إنه يوجع
التاني بسببها! بكيت وانهارت مكاني وأنا بعيد الفيديو
كذا مرة وبتأكد من اللي أنا شايفاه، وقدرت أحفظ
كل لحظة في الفيديو في دماغي.. اتحركت بخطى
بطيئة كإني مش واعية وفعلًا كان شكلي مرعب
وشي باهت متغرق بالدموع وعيوني حمرا ومبرقة
وشعري مش مترتب كل الحرب اللي جوايا كانت
منعكسة على حالي كنت عارفة طريقي كويس
وحافظاه من سنين، فتحت باب الأوضة براحة
وقفلته ورايا، كانت ضلمة خالص زي ما بيحب،
اعتقد قدرت أفهم إيه سر حبه للون الأسود
والضلمة، كان بيحس إنه بيتدارى وراهم، إنهم

بيخفوا حقيقته. مشيت لجوا وأنا بستنشق ريحة
برفانه اللي مالية الأوضة، وبصيت عليه، كان رايح في
النوم، شعره الناعم مشعث ونازل على وشه
بفوضوية سحببت الكرسي وحطيته بهدوء قدام
سريره، وقعدت أتأمله معرفش قد إيه بس كنت
بحفظ ملامحه في قلبي مديت إيدي وابتديت أملس
على ملامحه وأنا ببصله بعيون مليانة دموع، مش
متخيلة إن الملاك اللي قدامي ده كان بالشكل ده!
كنت برسم ملامحه جوايا بإيدي اللي ماشية على
وشه رفعت شعره من على جبهته بخنان، وميلت
عليه وطبعت قبلة عميقة على خده مليانة مشاعر
متضاربة عكس بعض، فنزلت دمعة من عيوني
غصب عني عليه خلته اتململ بضيق وفتح عينه..

متحركتش ولا حركت إيدي من على وشه، فضل
يرمش كذا مرة كإنه بيتأكد إني قاعدة قدامه فعلاً ولا
بيحلم، وفلحظة اتعدل وفتح نور الأباجورة من جنبه
وهو ببصلي باستغراب _ منة! أنتِ كويسة؟ فيكي
حاجة؟ إيدك فيها حاجة؟ ابتسمت ابتسامة مليانة
ألم وأنا شايفة الخوف الصادق اللي باين على وشه،
ومديت إيدي ملّست بيها على وشه بخنان _ من
ساعة ما وعيت على الدنيا وأنا مش شايفة قدامي
غيرك، كنت حب طفولتي ومراهقتي وشبابي، كنت
سبب كل فرحة في قلبي، وكنت سبب كل وجع فيه
، أنا عمري ما اتمنيت راجل غيرك يا سليم، عمري
ما حببت غيرك أبداً، وكنت مستعدة أعمل أي حاجة
عشانك، بس أحس إنك بتحبني مش كارهني! أحس

إن ليا مكان جواك ولو قليل! نزلت دموعي والغصة
اللي في قلبي كانت مؤلمة بشكل لا يطاق، حس
وقتها إني مش في حالي الطبيعية، فاتعدل وقرب
مني وضممني وهو بيملس على شعري بحنية..
_ششششش اهدي.. _أنت كنت عارف إني مكنتش
واعية على حاجة، مش بريئة ولكن مكنتش عارفة
عواقب تصرفاتي كنت عارف ومتأكد إني ضحية زي
زيك بالظبط وإن سميرة استغلتنني أنا كمان، وأنا
عارفة إنك من جواك مش بتلومني على اللي
حصل، ولكن كل اللي بتعمله ده كان من احساس
العجز وقلة الحيلة اللي كنت فيه، كنت بتحاول
تفرغ النار اللي جواك فيا يمكن تنشغل عن دوشة
دماغك، عشان كده كنت بتصارع نفسك عشان كده

كنت بتعمل الحاجة وعكسها! شوفت أنا لقيالك
ازاي ميت مبرر؟ بس وأنت بتعمل كده كنت
بتموتني بالبطء بتزود كرهني لنفسني بتحسني
إني مسخ حسيته بيقاوم حاجة جواه، فشدد على
ضمه ليا من غير ما يتكلم، مكانش عارف يقول إيه
في موقف زي ده متعودش أساسًا إنه يبوح باللي
حاسس بيه ولكني بعدت عنه، وبصيت في عينيه
اللي كانت بتتهز بتوهان وملامح وشه المتشنجة،
رفعت إيدي قدام عينيه.. _اتفضل دلوقتي سميرة
مش هتقدر تبتزك تاني، دلوقتي تقدر تنهي اللعبة
وأنت متطمن.. يتبع... #تحت_التهديد
#منة_ممدوح_البنا مبنزلش الحلقات بطلب تفاعل

ياريت تقدروا الكاتبة وتتفاعلوا عشان الكاتبة تكمل



———— Part Break ————

أنت تقرأ حدوتة "رواية" بالعامية المصرية، بتتكلم
عن بنت خدعت شاب وخلته يتجوزها، وبعد سنين
رجع من السفر، يا ترى هيتصرف معاها إزاي؟ وإيه

اللي جابره على الجوازة دي؟! هيتطلقوا ولا هيكملوا
سوا! تحت التهديد للكاتبه منة ممدوح البنا كل يوم
تحت التهديد " الحلقة السابعة اتجمد " □ حلقة
تمامًا مكانه، وكان الدنيا ضاقت بيه، لينقل نظراته
بيني وبين الفلاشة اللي في إيدي، كإنه بيتمنى إني
مكونش شوفت اللي فيها، ابتسمت بألم بهد أمانيه
وبوصله إني عرفت كل حاجة.. _ سميرة هددتني زي
ما هددتك، قولتلها إني هروح أحكي لبابا كل حاجة،
هددتني إنها هتقوله إن أنا اللي كنت برمي نفسي
عليك، وإنها شافتني كذا مرة مع كذا واحد قبل كده
وهي مرضيتش تحكيه ميّلت براسي ودموعي نازلة
على وشي _تفتكر كان بإيدي إيه أعمله يا سليم؟
وأنا عاجزة مش عارفة اتصرف من قلة خبرتي،

ومعنديش أم توجهني للصح والغلط! غلطت؟ أيوه
غلطت لما مشيت وراها، بس اغرتني! اغرتني يا
سليم وأنا في سن مكنتش مستوعبة فيه عواقب
اللي بعمله، بس حتى لو مكونتش أنا وافقت كانت
هتعرف تبتزك برضه! _منة... خرج صوته بيحة
ضعيفة، فقاطعته وأنا بحط الفلاشة في إيده وبقفل
عليها _أنت حر دلوقتي اعتقد كده تقدر تطلقني
من غير قلق قومت وقفت وأنا بمسح دموعي
واتحركت عشان أمشي، ولكنه مسكني من دراعي،
اتلفت ليه وللحظة اتصدمت لما لقيت عينيه مليانة
دموع، بيبادلني بنظرات ضعف قلة حيلة تأنيب
ضمير! كان عاجز، سليم الفترة دي كلها كان عاجز!
_مكنتش أتخيل إن تصرفاتي الطايشة دي هتكون

أخرتها، بس صدقيني كانت أول مرة والله العظيم
كانت أول اشرب فيها مرة يا منة ومتكررتش تاني!
هو اللي طلب مني أديله الحقنة، أنا نفذت اللي
طلبه بس! غمضت عينيا بالمـ وُضِلِت للفلاشة
إزاي؟ متهيألي آن الأوان إنك تعرفني مبقاش فيه
حاجة تدارى يا سليم! شدني بالإجبار لحد ما قعدت
جنبه، اخذ نفس طويل، اتكلم وهو محتوي إيدي
بين إيديه وكإني ههرب منه _ صاحب الشقة كان
عارف أنا ابن مين، ركبنا كاميرا في الشقة عشان
يبتزني بالفلاشة قصاد مبلغ كبير، وفعلنا اديته المبلغ
واخذت منه الفلاشة، سيبتها تحت مخدتي ودخلت
أخذ شاور سميرة دخلت اوضتي تشوفها اتنصفت
ولا لا، ولما ملقتهاش اتنصفت وهي بتشيل فرش

السريـر وقعت الفلاشة.. ضم شفـايفه_وخـدتها
_وبعد ما عرفت محتواها ابدت تبتزك بيها هز
راسه من غير ما يعلق، كان جوايا صراع مش قادرة
اتقبل إن سليم اللي حبيته هو اللي في الفيديو!
_تفتكر عشان كنت طايـش وصغير مبرر على اللي
عملته؟ بصلي بنظرة مليانة عذاب_مكنتش أعرف!
_وأنا مكنتش أعرف برضه يا سليم! رديت بسرعة،
فكملت_زي ما أنتَ كنت طايـش وأغرتك تجربة
المخدرات، أنا كنت عيلة ١٤ سنة وأغرتني الفلوس
والعربيات... وأنتَ.. سكت شوية وهو مشالش عينه
من عليا، كان مكشوف قصادي، من غير ما يداري
مشاعره ولا يخبي، كانت أول مرة أشوف سليم
الحقيقي.. _وأنتَ كنت فوق كل الحاجات دي، كنت

طفلة بتحبك وعندها هوس ببيك، والمشكلة إني
لسة الطفلة اللي بتحبك برضه! قولتها وأنا بضحك
بألم، رفع إيداه وحاول يقرب مني، ولكني منعتة وأنا
بقول_ليه شايف إن ده مبرر ليك، ومش مبرر ليا؟
ليه شايف إن أنت ضحية طيشك وأنا سني
ميشفعليش؟ أنت قاتل يا سليم عارف يعني إيه
تتسبب في موت واحد! سكت ونزل راسه وهو
بيضغط على عيونه بقوة، وكأنه بيتألم من تأنيب
ضميره _ شوفت الكلام بيوجع إزاي؟ شوفت مجرد
إني ضربت الحقيقة في وشك حتى لو كان غصب
عنك حتى لو كان أول مرة شوفت حسسك بيايه؟ أنا
كنت بعيش الاحساس ده كل يوم على إيدك يا
سليم! ساب إيدي ورفع إيديه يمسح على وشه

بعنف، الضغط اللي كنا فيه كان شديد بدرجة رهيبة
_ طول السنين دي وأنا مش عارف أعيش بشكل
طبيعي بسبب اللي عملته! أنا كنت بتعذب يا منه
من غير ما اتكلم أو أبين، سافرت وهربت عشان
أبعد عن كل حاجة تفكرني باللي حصل، عشان أبعد
عن عين سميرة اللي كانت كل نظرة منها بتقولي
فيها أنا عارفة حقيقتك! _وأنا كنت بتعذب برضه يا
سليم، وأنتَ مرحمتنيش، قبلت تشوفني بتألم
قصادك من كلامك وسكت! سكت ومقدرش يرد،
فهزيت راسي كذا مرة ووقفت ونويت أخرج، ولكني
اتجمدت مكاني.. _أنا بحبك! من وأنتَ طفلة كنت
شايفك ملزمة مني، كنت حاسس إنك بتعوضيني
عن إني معنديش اخوات، مكنتش أعرف حقيقة

مشاعري ناحيتك غير إنك غالية عليا أوي كنت
حزين إن الأذى اللي جالي كان ليكي دور فيه!
ارتجفت وانا بسمع اعترافه لأول مرة، قد إيه اتخيلت
إنه بيقولهاالي وأنا بجري عليه بضمه، قد إيه اتخيلت
إني بعيش معاه حياة طبيعية في بيت دافي مليون
حب ولكن الحواجز اللي بينا بقت أعلى مني ومنه
_كان نفسي اسمع الكلمة دي منك من زمان، بقالي
٦ سنين بتمنى اسمعها واشوفها في عينيك! دمعت
وهو باصصلي بعجز، مكانش قادر يقوم من مكانه،
وكنت بتألم من العذاب اللي أنا شايفاه فيه مش
عارفة هقدر أكمل معاه بعد ما صورته اتكسرت
قدامي ولا لا! الصورة المثالية اللي أنا خلقتها له
اعتقد الموضوع محتاج وقت. ليا وليه يمكن جروحنا

تداوي.. _هنتطلق يا سليم زي ما كنت عايز، مش
كان اللي مانعك تعملها هي سميرة؟ خلاص
مبقاش فيه حاجة تمنعك قام وقف ومد إيديه
احتوى وشي بينهم ونظراته كانت مليانة إصرار
وليه منكملش يا منة؟! ضحكت بألم مبقتش عايز
تكمل معايا غير لما حسيت إنك مبقتش مجبر
عليها، لما الحاجة اللي اتجبرت تتجوزني عشانها
اتتهت، رغم إن مشاعرك متغيرتيش بس كنت
برضه رافضني، مكانش عندك مشكلة تتخلي عني
عشان بس تحس إنك بتعمل حاجة بإرادتك!
مينفعش نكمل يا سليم وأنتَ شايفني اتسببت في
شقلبة حياتك، وأنا شايفاك مدمن اتسببت في قتل
واحد! حسيت إيده ارتجفت، كان كلامي قاسي عليه

بس هتفضل هي الحقيقة حتى لو بتوقع فميلت
على إيده بوشي وقولت وأنا بيتسم بألم_يمكن في
وقت تاني، في زمن تاني، أو في عالم تاني يمكن... نبقى
مع بعض وقتها خلصت كلامي وشيلت إيده من
عليا وسيبته ونويت أخرج من الأوضة وأنا بمسح
دموعي، كمية الألم اللي أنا حساه متتوصفش ليه أنا
بالذات قصة حبي الوحيدة تكون بالصعوبة والعجز
ده؟ ليه مكناش زي اي اتنين طبيعيين حبوا بعض
واتجوزوا وعاشوا في بيت دافي؟ ليه الدنيا ضدي
بالشكل ده؟! _منة... مقدرتش مبصلوش، اتلفت
على صوته الضعيف، نظراته كانت كلها توسل أول
مرة أشوفها في عينيه مد إيده ليا _أنا عايزك جنبي..
دلوقتي بس حتى لو لآخر مرة خليكى جمبي، عايز

أجرب احساس قربك من غير حواجز مرة! شهقت
بألم وأنا ببكي غصب عني، ومقدرتش أقاوم وجريت
عليه ضميته بقوة، كان بيتشبث فيا زي الغريق
اللي لقي وسيلة نجاته، بعد وطبع قبلة عميقة على
جبهتي كانت أول مرة أبقي بقرب سليم للدرجة دي،
فضلت نائمة في حضنه، وهو كإنه ما صدق وغرق في
نوم عميق وهو ضاممني بقوة وكأنها آخر مرة
هيشوفني فيها ومين عارف يمكن تكون آخر مرة
فعلاً! مقدرتش أنام وفضلت بقاوم عشان أحفظ
اللحظات اللي مش هتتعاد دي في عقلي، عشان
استمتع بكل لحظة في قربيه اللي اتمنيته من سنين
كنت بصاله وبتأمله وهو نايم وبداعب شعره بحنان
الحواجز بينا بدل ما تقل بتكبر فيه حاجة اتكسرت

وكبيرة! مش عارفة ازاي ممكن اكمل معاه وأنا
شايفة ليه دور في إنهاء حياة واحد هو غلطان وأنا
غلطانة إحنا الاتنين ضحايا ومذنبين في نفس الوقت
يمكن بقينا متساويين دلوقتي أنا شقيلت حياته
وهو أذنب في حق إنسان! وبمقاومة كبيرة من
نفسي، قدرت أقوم وأخرج من غير ما يحس، لو كان
عليا كنت فضلت في حضنه عمري كله ومكانش
هيكفيني كمان! نزلت لتحت وكانت الساعة بقت ٢
بعد الظهر تقريبًا، كل الوقت ده كنت بتأمله بس!
مش عارفة جيببت الجرأة اللي تخليني أنزل من
أوضته في عز النهار من غير ما أخاف، بس وقتها
حسيت بتبلد في مشاعري، كنت عايزة كل حاجة
تخلص بس لقيت الكل متجمع في بهو القصر،

بصيت ليهم باستغراب فاكشفت إن والد سليم
رجع من السفر وكان عاملهم مفاجأة تقريبًا فعشان
كده محدش كان يعرف. كانت سميرة وبابا من
ضمن اللي موجودين، اتحركت ناحيتهم فالتفتوا
كلهم وعلى وشهم كل معالم الاستغراب من
وجودي في القصر وكمان نازلة من فوق وأنا بقالي ٦
سنين ممنوعة من دخوله.. وقفت نادية والدة سليم
واتكلمت بحدة_بتعملي إيه فوق يا بت أنتِ؟!
مردتش عليها واتحركت ناحيتها، كنت جامدة
وحسيت إن كل المشاعر اللي كانت جوايا اتمحت،
زي الانسان الآلي بالظبط.. وقفت في النص وفضلت
ساكتة، ولكن نظراتي كانت على سميرة اللي حست
إني هعمل حاجة فكانت بتهددني، ولكن مهتمتش

_متهيا لي لازم اللعبة دي تخلص، ولا إيه يا سميرة؟!

حسيتها اتلجلجت، فاتكلم اكرم والد سليم

باستغراب_ لعبة إيه؟ ابتسمت بشر، كانت جوايا قوة

غريبة، كانت قوة بقدر عذاب قلبي طول السنين دي

كلها.. _ لعبة جوازي أنا وسليم اللي كانت تحت

التهديد شهقت سميرة بخضة، وكلهم مكانوش

مستوعبين اللي بقوله، قربت مني سميرة بسرعة

وشدتني بعنف من دراعي وهي بتهمس من بين

أسنانها_ أنتِ اتجننتي؟ بتعملي إيه يا متخلفة؟!

جذبت إيدي منها واتكلمت بقوة_ جرا إيه يا مرات

أبويا، مش لازم نعرفهم برضه إنك كنتي مهدداني أنا

وسليم عشان يتجوزني ولا إيه؟ شيلت عيني من

عليها وبصيت للي موجودين _ سميرة من ٦ سنين

هددت سليم إنها هتلبسه في قضية قتل بعد ما
دبرتله كمين مع واحد زفته عليه، وكمان هددتني
إنها هتقول إنها شافتني مع حد لو قولت لحد إن
سليم متجوزني بالتهديد قررت انتقم منها واغير
معظم الحقايق، كان لازم اظهر وشها الحقيقي
صرخت بجنون_ كدابة، كدابة محصلش الكلام ده!
_تنكري إنك استخدمتيني عشان توصلني للفلوس
والجاه وإنك تبقي ست القصر عن طريقي أنا
وسليم بعد ما دخلتينا في لعبة قذرة؟! _كلام إيه
اللي بتقوليه ده يا منة؟! قالها بابا بزعيق وهو بيتجه
ناحيتي وملامحه باين عليها الغضب _منة
مكدبتش! اتحركت انظارهم كلهم ليه، كان نازل على
السلام وهو بيراقب وشوش الكل، لحد ما عينه

ثبتت عليا وكان يببصلي بامتنان! قرب ووقف
جني_سميرة فعلاً هددتنا احنا الاتنين، واحنا الاتنين
كنا ضحايا جشعها وطمعها، وكلامي قصاد كلامك يا
سميرة! _هتبتلكوا إنه كذب، هتبتلكوا إن ابنكو
الحيلة مش ملاك اتحركت ناحية البدروم اللي مكانه
تحت سلالم القصر _اللي بتدوري عليه مش
هتلاقيه يا سميرة، متتعبيش نفسك! قالها سليم
وهو يببصلها بتريقة، كانت بتبادله بعدم استيعاب
لحد ما نقلت نظراتها ليا فلقطني بتسملها بشماته،
وقتها عرفت إني لقيت الفلاشة وادتها لسليم كمان،
برقت وعينيها احمرت وحسيت إنها على وشك
الجنون، وجريت ناحيتي وهي بتصوت_أنتِ عملي
إيه! عملي إيه يا متخلفة! بوظتي كل حاجة كل

حاجة اتخططت دمرتيها أنتِ كنتِ تطولي العز ده
لولايا! منعها سليم من إنها توصلي بعد ما شدي
لورا ضهره، حسست هي إن استحالة حد يصدقها بعد
ما انكشفت قدامهم، فبقت تزعق وتشد في شعرها
بجنان، ازاي متجننش وهي لقت إن كل خطتها
باظت وخلاص هتخسر كل حاجة، وهتخسر الغنى
اللي هي كانت فيه.. _كذب، الاتنين كدايين سليم
قاتل ومنة كانت مع... هنا اتدخل والد سليم وفجّر
اللي محدش كان يتوقعه لما قال _كذب إيه يا
سميرة؟ اتوقعها منك بصراحة، ما أنتِ كان ممكن
تعملي أي حاجة عشان الفلوس حتى لو هتخوني
جوزك معايا! شهقت وعيني اتوسعت بصدمة،
وصدمتي مكانت تقل حاجة عن اللي كانوا في

القصر اتكلم بابا بحدة_إيه اللي بتقوله ده يا أكرم
بيه؟! انكمشت هي على نفسها وهي بتبص لأكرم
بيه برعب حقيقي، كان باين عليها الذعر، ابتسملها
بخبث_أحكي ولا تقولي أنتِ ارتعشت
شفافيتها_كذب كلهم كدايين، كل اللي بيقولوه كذب!
_مراتك يا ناجي كانت متجوزاك عشان شايفاك
طريق يوصلها للجاه والثرء لما عرفت إنك بتشتغل
معايا وكمان ساكن هنا في القصر، وكانت خطتها إنها
توقعني بس كشفتها، وعشان خاطر كبرياءك،
وخطر البنت اليتيمة اللي معاك قفلت على
الموضوع بس مكنتش أعرف إنها اتجهت لابني
عشان تحقق غرضها الحقيقير بصلها بابا بدهشة وهو
حاسس إن الدنيا بتنهار من حوالية، حاسس إنه لأول

مرة يشوف الوش الحقيقي لمراته وجشعها الوش

اللي عمره ما شافه قبل كده أو كان معمي عنه

_هي حُصّلت! _لا لا لا محصلش، محصلش كانت

بتهز راسها بجنون، فكمل والد سليم_ليه تنكري

إنك جيتيلي المكتب تعرضي نفسك عليا؟ بس

للأسف يا سميرة، مكنتش أهبل لدرجة إني ذوقي

ينحدر بالشكل ده من هانم لواحدة زيك!

_متصدقهاوش _اخرسي زعق بابا وهو بيضربها بقوة

بالقلم لدرجة إنها وقعت على الأرض، شدها بعنف

ومن غير تردد رماها برا القصر وسط مقاومتها

وصويتها بإن سليم قاتل وإني كدابة وإن والد سليم

كذاب، ولإن كلامها مكانش مترتب، فالكل شافوها

بتعمل كده علشان خطتها باظت كنت براقب اللي

بيحصل بصدمة وخوف، حتى محستش بسليم وهو
محاوطني وضاممني ليه بحماية رفعت عينيا ليه،
فابتسملي بامتنان، بادلته ولكن اتبدلت ابتسامتي
للحزن خلاص كل حاجة انكشفت واللعبة خلصت
واللي بيني أنا وسليم كمان خلص.. يتبع... #
- تحت_التهديد # منة_ممدوح البنا © ٢٠٢٥

Wattp

———— Part Break ————

أنت تقرأ حدوتة "رواية" بالعامية المصرية، بتتكلم
عن بنت خدعت شاب وخلته يتجوزها، وبعد سنين
رجع من السفر، يا ترى هيتصرف معاها إزاي؟ وإيه
اللي جابره على الجوازة دي؟! هيتطلقوا ولا هيكملوا

سوا! تحت التهديد للكاتبة منة ممدوح البنا كل يوم
لسة برضه مبيردش؟ قالها سليم وهو _ □ حلقة
داخل من باب الشقة، كنت واقفة قصاد باب اوضة
بابا، اللي من بعد اللي حصل وهو خرج من سكات
وقفل على نفسه هنا ومبيردش حتى عليا! حسيت
إنه نفسه اتكسرت من الوضع اللي اتحط فيه
ومفيش أي راجل ممكن يقبله على نفسه، وفنفس
الوقت كان حاسس بالذنب من السنين اللي فضل
مجافيني فيهم بعد ما صدق كلام سميرة وقدرت
تبخ سمها فيه هزيت راسي بـ لأ وكملت دق على
الباب _بابا بالله عليك رد عليا طمني حتى! عشان
خاطري فضل سليم واقف ورايا بيتابعني بحزن،
شدت على شعري بهم ورجعت اخبط تاني_أنا

مش بلومك والله، أنت اتضحك عليك زينا، بس
مممكن تفتح ونتكلم بس متقلقنيش عليك أكثر من
كده بالله عليك احمد ربنا إنك كسفتها بدري قبل
ما يمر عمر طويل وأنت مخدوع فيها! استنيت على
أمل يرد ولكن محصلش، فاتحركت وقعدت على
الكنبه ولحقني سليم قعد جنبي برضه. فضلت بهز
رجلي وأنا بقاوم الغصة اللي حاسة بيها من الأحداث
الأخيرة، لحد ما دمعت غصب عني، قرب مني
سليم أول ما شافني واحتوى وشي بين إيديه وهو
بيمسح دموعي بحنان _لا، لا متعيطيش، خليكي
قوية زي ما اتعودت عليكي نزلت عينيا للأرض _
مش قادرة يا سليم، تعبت من تمثيل القوة! كنت
بتقول عليا ممثلة هايلة كان عندك حق بس كل ده

على حساب نفسي نظرتَه اتغيرت وحس بتأنيب
الضمير من كلامه القاسي اللي لسة معلم فيا،
فشدني ضمني ليه وسند على الكنبَة سندات راسي
على صدره وغمضت عيني بستمته بالاحساس
اللي غمرني بيه كان بيملس على شعري بحنان وهو
باصص قدامه بشرود، ومال وطبع قبلة على شعري
ابتمست بمشاعر متضاربة وأنا حاسة إن قلبي
بيعلن تمرده على كل قراراتي_آخر مرة عملت
الحركة دي.. قاطعني وكمل_لما وقعتِ ورجلك
اتفتحت بعدت عنه وأنا ببصله بإندهاش_أنتَ لسة
فاكر؟! ملس على وشي_أي ذكرى بينا عمري ما
نسيتها!_كنت بدور عليك، بدور على سليم اللي
كان موجود زمان مسك إيديا الاتنين واحتواهم

بقوة_أنا لسة موجود سليم القديم هيرجع معاكي
أنتِ كانت عيونه مليانة أمل وحب كنت بتمنى إني
أشوفهم فيها نبرته الدافية كانت بتأثر عليا، اتبدلت
نظراتي للحزن وشديت إيدي ونقلت عينيا للأرض
اتنهد بآلم_الحقيقة غيرت حاجات كثير مش كده؟
شايفاني قاتل؟ اتلجلجت وحسيت بإني ارتجفت،
الحقيقة أنا جوايا مشاعر متضاربة، الدقايق القليلة
اللي في الفيديو ثابتة في عقلي ومش عارفة امحيها،
مردتش فمحبش هو يضغط عليا وسكت وهو
بيضم شفايفه بآلم ورجع سند ضهره على الكنبه
تاني. للحظة اتعدلت لما سمعت صوت قفل الباب
بيتفتح، قومت وقفت وقربت ناحيته وورايا سليم.
خرج بابا من الباب وهو بينقل نظراته بينا وفي إيده..

شنطة سفر! للحظة اتوقعت اللي ناوي عليه،
ولكني كنت ببصله بترجاه إن اللي ناوي عليه يرجع
فيه، قرب ناحيتي وهو بيتحاشى أنه يبص لسليم،
ولعيني! وقبل ما اتكلم قال_لمي هدومك
وحاجاتك يلا عشان هنمشي _تمشوا فين؟! قالها
سليم وشوفت الخضة في عينيه، ما صدق لقانا
قربنا شوية والحاجات اللي كنا خافيينها على بعض
ظهرت ليه لازم نبعد كل ما نحس إننا قربنا شوية!
ليه كل حاجة ضدنا بالشكل ده؟! _ملناش قعاد هنا
بعد كده يا سليم، فاعذرنا أنا بلغت والدك بالكلام ده،
وكمان هنخلص موضوع الجوازة اللي كنت متهدد
بيها خلص كلامه وبص ناحيتي_يلا يا منة! اتلجلجت
وحسيت إني فقدت النطق، أني اتطلق من سليم

هَيِّنْ عَن إِنِّي أَبْعَد عَنْهُ بِالشَّكْلِ دَه! هِيَبْقَى طَلَّاق
وَبُعْد! كَفَايَةِ السَّنِينِ الَّلِي كُنْتُ بَتَكْوِي فِيهَا وَأَنَا مَش
لَاقِيَاهُ حَوَالِيَا وَمَش شَايْفَاهُ قَدَامَ عَيْنِيَا هَرْجَعُ أَعِيشْ
الْأَحْسَاسَ دَه تَانِي! حَتَّى الرَّاِبِطِ الَّلِي كَانَ بِيَهُونِ عَلِيَا
هِيَنْتَهِي! مُسْتَغْرَبَةً لِيَهْ؟ مَا دَه الطَّبِيعِي وَالَّلِي كَانَ
هِيَحْصَلُ أَسَاسًا حَتَّى لَوْ كُلُّ حَاجَةٍ انْكَشَفَتْ، حَتَّى
لَوْ سَلِيمُ اعْتَرَفَ بِحَبِّهِ لِيَا بَسْ هَلْ أَنَا هَقْدَرُ أَعِيشْ
حَيَاةً طَبِيعِيَّةً مَعَاهُ وَأَنَا مَش قَادِرَةٌ أَنْسَى الْوَضْعَ
الَّلِي كَانَ فِيهِ وَالَّلِي اتَّسَبَّبَ فِيهِ! نَقَلْتُ نَظْرَاتِي بَيْنَهُ
وَبَيْنَ سَلِيمِ الَّلِي كَانَ بِيْتَرَجَانِي إِنِّي أَرْفُضُ إِنِّي أَفْضَلُ
جَمْبَهُ كُنْتُ مُتَرَدِّدَةً وَأَنَا شَايْفَةُ الْكُسْرَى فِي عَيْنِ بَابَا،
وَكُنْتُ فَاهِمَاهُ، إِزَايَ هِيَقْدَرُ يَعِيشْ هُنَا وَيَحْطُ عَيْنَهُ فِي
عَيْنِ أَهْلِ سَلِيمِ وَبِالذَّاتِ أَبُوهُ الَّلِي مَرَاتَهُ عَرَضَتْ

نفسها عليه من غير حياء! حس بابا بالتردد اللي
جوايا، فزفر بنفاذ صبر وقال_هتيجي معايا ولا
هتفضلني هنا؟ مكانش عندي استعداد اخسر بابا
للمرة الثانية، كنت عايزة أعوض السنين اللي أنا
اتحرمت فيها منه فاتكلمت بسرعة وأنا عيني على
سليم_لا لا هاجي معاك _منة! قالها سليم وهو
مصدوم، كان عنده أمل ولو بسيط إني هرفض
وأفضل هنا جنبه، ولكني خيبت كل توقعاته،
مكنتش قادرة اشوف النظرة دي فعيونه فحاولت
اهرب _أنا هدخل أجيب هدومي وحاجتي
ومستنتش رد حد فيهم ودخلت بسرعة لاوضتي،
قفلت الباب وسندت عليه وأنا بتنفس بعنف، مش
قادرة اتخيل إني هبعد عنه خلاص! سمحت دموعي

ودخلت ألم هدومي في شنطة سفر وأنا بقاوم البكا
ولكن شفايفي اللي كانت بتترعش عاكسة الإنهيار
اللي جوايا. خلصت وخرجت ولقيته قاعد حاطت
راسه بين إيديه، أول ما شافني نقل نظراته بيني أنا
والشنطة وميل براسه بحزن قام بابا خد مني
شنطتي وشنطته ونزل وساب الباب مفتوح من غير
ما يتكلم أو يقول أي حاجة فضلت واقفة مكاني
مش عارفة أقرب ولا عارفة ابعد بتأمله وأنا بحفظ
ملاحه جوا عقلي _ هتمشي؟ قالها بنبرة بيقاوم
فيها الحزن، فضميت شفايفي بأسى _ كان لازم
ييجي يوم وأمشي! _ كان ممكن نكمل _ ازاي؟
رديت بسرعة، وكملت وأنا برفع كتفي بقلة
حيلة _ الحواجز اللي بينا كبيرة أوي يا سليم،

المشكلة انها بتزيد كل يوم مش بتقل! سليم أنت
كان قدامك تختارني من زمان، ليه جاي تختارني بعد
ما كل حاجة خلصت! كام مرة كنت مستنية إشارة
منك، ومع ذلك مكنتش بشوف غير الرفض! سكت
شوية بمسح دموعي_عارف احساس إنك تبقى
مرفوض من الحاجة الوحيدة اللي اتمنيته؟ أنا كنت
بعيشه كل يوم على إيدك نزل راسه وهو مش قادر
يتكلم، مش قادر يبدر لنفسه الفترة اللي فاتت
مكناش بنعمل حاجة غير إننا نجرح في بعض جروح
غرزت وعلمت واعتقد هتاخذ وقت كبير عشان
تتداوى وبدون تردد قربت منه وطبعت قبلة على
خده بودعه بيها، غمض عينه من قوة المشاعر اللي
حاسس بيها، بعدت عنه وابتسمت

بألم_هتوحشني.. قولتها وسيبته ونزلت لتحت قبل
ما أضعف أكثر وأرمني نفسي بين إيديه الرفض بعد
ما كان من ناحية سليم بس، هيبقى من أهله،
هيبقى من بابا، هيبقى من كل اللي حوالينا أنا مش
مستعدة أشوف نفسي بتكسر تاني قصاد حد أو
يمكن مش ده السبب الوحيد! الحقيقة إني مش
قادرة أغفر لسليم اللي عمله زمان كان طايش! وأنا
كنت صغيرة! كانت أول مرة ليه واغرتة التجربة وأنا
اغرتني الحياة اللي هنا بس هيفضل برضه السبب
في ضياع روح واحد بابشع طريقة ممكنة حتى
عشان يهرب من الموضوع سابوه لوحده محاولوش
ينقذوه القسوة اللي شوفتها في الفيديو كانت أكبر
حاجز بينا، خفت لييجي اليوم وادوق القسوة دي

منه وساعتها اكرهه! نزلت لبابا تحت فلقيته مجهز
العربية ومستنيني، بصيت ورايا فلقيته بيتحرك
ببطيء، ركبت العربية وفضلت عيني عليه، كانت
نظراته جامدة، فاقدة للحياة ومش واضحة، ضامم
قبضة إيديه بقوة، وعروق وشه بارزة من ضغطه،
كان بيتألم ولكنه ييقاوم اتحركت العربية، ففضلت
بصالة، ورفعت إيدي أودعه واودع البيت اللي
Wattp - عيشت فيه معظم حياتي.. © ٢٠٢٥

أنت تقرأ حدوتة "رواية" بالعامية المصرية، بتتكلم
عن بنت خدعت شاب وخلته يتجوزها، وبعد سنين
رجع من السفر، يا ترى هيتصرف معاها إزاي؟ وإيه
اللي جابره على الجوازة دي؟! هيتطلقوا ولا هيكملوا
سوا! تحت التهديد للكاتبة منة ممدوح البنا كل يوم

عدى كام يوم، كنا قدرنا ننقل كل حاجاتنا □ حلقة
في الشقة اللي بابا أخذها لينا، حتى ساب الشغل
اللي مع عيلة الشهاوي واشتغل في مكان تاني كان
عايز يقطع أي صلة تربطه بيهم، مش قادر يواجه
حد منهم، كنت بشوف نظرة الانكسار كل يوم على
وشه ومبقدرش أعمل حاجة يمكن اللي مهون
الوضع إن علاقتي بيه بدأت تتحسن شوية، بدأنا
نرجع اسرة دافية تاني! جهزت نفسي وخرجت
لجامعتي اللي كان بقالي ١٠ ايام تقريًا مبروحهاش
لبست كاجوال وربطت شعري وحطيت ميكب
بسيط يداري بيها هالاتي والانطفاء اللي ظاهر على
وشي ١٠ ايام بس واشتاقت ليه بالشكل ده، فما
بالك لو سنين! ١٠ ايام معرفهش فيها حاجة عنه،

بقينا زي الغرب محدش فينا حاول يوصل للتاني
حتى! على الاقل قبل الأيام دي كنا بعاد بس قادرة
املي عيني منه اتنفس ريحته وأشوف عيونه!
وصلت لجامعتي ودخلت للمكان اللي فيه
محاضرتي، وللحظة حسيت بإن فيه حاجة مريبة!
الكل ببصلي وبيتهامسوا وحسيت من نظراتهم إن
فيها احتقار! حاولت احسس نفسي إنه متهيألي بس
من الضغط اللي أنا فيه، واتجهت لندي اللي كانت
في عينيها كلام كتير _كنتِ غايبة فين كل ده؟
اتنهدت بضيق _كويس إني جيت والله، سيبنا القصر
وروحنا سكنا في شقة تانية وبابا ساب كل شغله مع
عيلة الشهاوي هزت راسها من غير ما تعلق، ولكنها
اتكلمت فجأة _كنتِ قولتيلي إيه سبب جوازتك من

سليم الشهاوي؟! بصتلها باستغراب لملامحها
الغريبة، ورديت بتعجب_إيه يا بنتي ما قولتلك قبل
كده! هزت راسها كذا مرة_آه فعلاً قولتيلي _هو فيه
حاجة يا ندى؟ قولتها وأنا بتأمل المكان من حواليا،
كان فيه حاجة مربية فعلاً ليه نظرات الكل متوجهة
ليا؟! _لا مفيش، وعلى كده سيبتوا القصر والعز ده
كله ليه؟ _مفيش حصلت مشكلة بين بابا وأكرم
الشهاوي، فقرر يسيبهم كنت متعودة إني محكيش
تفاصيل حياتي حتى لو لأقرب حد ليا يمكن لإن
حياتي مكانتش طبيعية! _وجواذك أنتِ وسليم؟
للحظة سكت واتبدلت نظراتي للحزن _ما أنتِ عارفة
إن كده كده كانت على الورق، فأكيد كان هيجي
اليوم وهنتطلق معلقتش، وده خلاني اتعجب اكرر،

ندى مش في حالتها الطبيعية النهاردة ولكني لقيتها
اتكلمت مرة واحدة بعصبية_منة أنتِ ناوية تفضلي
تكدي عليا لحد امتى؟! للحظة ارتبكت من قصدها
_يعني إيه مش فاهمة؟ _يعني الكلية كلها دلوقتي
ملهاش سيرة غير إنك أجبرتني سليم يتجوزك بعد ما
مسكوكي معاه. وإن كل ده كان تخطيط منك طمعًا
في فلوسه، يعني مش عشان أنتِ البنت الوحيدة في
القصر ولا الاسباب العبيطة اللي قولتيها لي! عينيا
اتوسعت برعب والدم كله انسحب من وشي، نقلت
نظراتي بينها وبين كل اللي في المدرج، قدرت افهم
ليه كلهم مركزين معايا ارتجفت ومقدرتش ارد،
وبدون تردد خدت شنطتي وخرجت بسرعة من
المدرج وأنا مش شايقة قدامي من الدموع اللي

مغرقة عينيا ازاى! ازاى التفاصيل دي وصلت هنا
وليه انكشفت في الوقت ده بعد كل السنين دي؟!
مقدرتش اتحمل كل النظرات والهمس اللي حواليا،
فانهارت وأنا بجري برا الكلية _ منة!... وكأن صوته
جالى زي طوق النجاة، كنت زي الغريق، أو التايه من
غير وطن، اتلفت بتأكد إنه موجود كانت ملامحه
مليانة قلق وخوف من حالي، وقبل ما يتكلم
جريت عليه وضميته وأنا ببكي بشدة ومتشبثة فيه،
ضمني والقلق اللي على ملامحه مقلش، ولكنه
فضل يملس على شعري _ اهدي، مالك يا حبيبتي؟
حاول يبعد ولكني منعتة وفضلت محاطة رقبته
بقوة، مقدرتش اتحمل صورتي اللي اتهزت بعد
السنين دي كلها قصاص صحابي! مبقتش قادرة افهم

ازاي ده اتعرف وليه الذنب ده هيفضل ملاحقني
كده ليه كلهم بيجلدوا فيا بالشكل ده! بعدت عنه
فرفع إيده يمسح دموعي بحنية، وملامحه القلقانة
مقلتش من حالتي _تعالى خدني من إيدي ومشيت
معاه من غير مقاومة كل القوة اللي كانت جوايا
اتبخرت قصاد النظرات اللي شوفتها قعدني في
عربيته، وغاب دقايق قليلة ورجع بماية وعصير فتح
الماية ومرضيش يخليني امسكها! كان بيشر بني هو
كإني بنته! كان في عينيه حنية ودفى كنت محتاجهم
جدًا في الوقت ده. وهو مترددش! سكت شوية بهز
رجلي بعنف، مش قادرة استوعب ولا قادرة افكر،
اتبدلت ملامحي للعصبية _أنتَ قولت لحد عن
سبب جوازنا؟ ضيق عينيه بعدم فهم_اللي هو؟

اخذت نفس طويل_أنتَ قلت لحد يا سليم إني
اتجوزتك بعد فضيحة عشان الفلوس؟ مقدرش
يستوعب في الأول غير لما ركز في كلامي، فاتوسعت
عينه بصدمة وزعق_أنتِ اتجننتي يا منة! معقولة
أنتِ شايفاني زبالة للدرجادي؟! كانت نبرته للآخر فيها
حزن بمقدار عصبيته، انهارت وفضلت اخبط
بقبضتي على رجلي_أومال عرفوا منين؟! اللي في
الجامعة عرفوا التفاصيل دي منين يا سليم! أنتَ
مش متخيل النظرات اللي كانوا ببصوها لي عرفوا
كل ده منين يا سليم قولي!! كانت ملامحه كلها
استغراب، وفلحظة سكتنا احنا الاتنين وبصينا
لبعض بصدمة، واتكلم سليم بعد
استيعاب_معقولة سميرة! وقبل ما نقدر نفكر،

وصلت رسالة على الواتساب لسليم، وأول ما فتحها

اتجمد تمامًا وبلع ريقه بصدمة بصتله بتعجب

وقربت منه أشوف إيه مضمونها، وللحظة ملئ

الرعب وشي لما لقيتها من رقم غريب باعتله رسالة

بالفيديو اللي كان في الفلاشة _ هو ده سبب هروبك

طول السنين دي؟.... يتبع.... #تحت_التهديد

Wattp - #منة_ممدوح_البناء © ٢٠٢٥

———— Part Break ————

أنت تقرأ حدوتة "رواية" بالعامية المصرية، بتتكلم
عن بنت خدعت شاب وخلته يتجوزها، وبعد سنين
رجع من السفر، يا ترى هيتصرف معاها إزاي؟ وإيه
اللي جابره على الجوازة دي؟! هيتطلقوا ولا هيكملوا
سوا! تحت التهديد للكاتبة منة ممدوح البنا كل يوم
الكاتبة قربت تختم الرواية متحمسين □ حلقة

□ © 2025 - Wattp

———— Part Break ————

"تحت التهديد" الحلقة الأخيرة اتبدلت ملامح وشه
للغضب، برزت عروق وشه من كتر الضغط على
فكه، كان حاسس بالضعف لإنها قادرة تبتزه بالشكل
ده، فدي كانت حاجة مضايقه من نفسه جدًّا كل ده

قدّرت اقرؤه، مش عارفة ازاي وامتى بقيت فاهماه
بالشكل ده! _ازاي؟ المفروض إن النسخة الوحيدة
من الفلاشة اللي كانت مع سميرة أنا خدتها سكت
وهو بيتنهد بضيق_كانت النسخة الوحيدة اللي مع
سميرة ضيقت عيني بعدم فهم_يعني؟ _بعد اللي
حصل النهاردة في الجامعة، والمسدج اللي اتبعتتلي
ديفسميرة كده بتنتقم، والظاهر قدّرت توصل للي
كان ببيتزني من ٦ سنين والظاهر برضه إنه خدعني
ومكانتش النسخة الوحيدة اللي معاه! ضغطت على
اسناني بغيط_طبّعًا سميرة مكانتش هتسكت بعد
اللي حصل وبعد ما طردناها من العز اللي كانت
فيه_بالظبط وبعدين كمل_متعرفيش أي عنوان
قديم لسميرة أو حتى أي معلومات عنها تساعدنا

حاولت افكر على قد ما أقدر لحد ما
قولت_معتقدش ومش هقدر أجيب سيرة عنها لبابا
الفترة دي واسأله، أنا ما صدقت إن حالته اتحسن
شوية بس كل اللي اعرفه عنها إنها كانت متجوزة
قبل كده، بس معرفش إيه حصل جوزها اختفى او
اتطلقوا، أو خلعتة معرفش تفاصيل نهيت كلامي
وأنا بهز كتفي، كنت فعلا معرفش غير المعلومات
الصغيرة دي، ومحاولتش اهتم إني أعرف_كويس
حسيت عينه لمعت بوميض غريب _طب هنعمل
إيه صحح في نفس الوقت وهو شارد قدامه في
الفراغ_أنا اللي هعمل بعد كده فضلت بصاله شوية
بحاول أوصل لأي حاجة من نبرة صوته عن اللي
يقصده، إلا إن كلامه كان مبهم، ولكن الأكيد إنه كان

ناوي على حاجة..مقدرتش أنزل الكلية الفترة دي،
دخلت في اكتئاب وزاد كرهى لسميرة باللي عملته،
مش كفاية إنها استغلتنى وابتزت سليم وبدل ما
تصح كل اللي عملته زادته سوء. وكإنها
مبتكتفيش من الأذى بابا كان حاسس إن فى حاجة
مختلفة، خصوصًا كرهى وتجنبى لنزولى الكلية،
ولكنى مكنتش عايزة أشيله هم عمايل سميرة.
جهزت نفسي وخذت فلوس ونزلت أقصد مكان
معين أجيب منه شوية أدوات محتاجاها للكلية
مشوفتش سليم طول اليومين دول، حتى محاولش
يتواصل معايا، رغم إني كنت قلقانة من اللي ممكن
يكون ناوي عليه وكنت مرعوبة للفيديو يوصل لإيد
حد وساعتها ممكن منعرفش ننقذه كنت بتنقل بين

المحلات بعد ما جيبت معظم الأدوات اللي
محتاجاها لحد ما وقفت واتجمدت مكاني كان
قدامي شخص يشبه اللي سليم اتسبب بموته!
شبه رهيب نفس الهيئة ونفس الشكل ولكنه كان
انحف شوية من كتر ما الفيديو ثابت في عقلي كنت
حافضة كل تفاصيله كل اللي موجودين وملامحهم
وهيئته ميمكن كل اللي موجودين ممكن تكون
هيئتهم اتغيرت زي سليم إلا إن الشخص ده كان
أكبر منهم، فشكله كان يعتبر ثابت هزيت راسي بـ
"لا" وقولت مش معقول ازاى؟! يمكن متهياي
يمكن شبهه بس! ولكني مقدرتش أقاوم فضولي،
اتسحبت وراه من غير ما ياخذ باله مش عارفة كنت
بقنع نفسي بيايه في الوقت ده بس حسيت إنها

صدفة غريبة دخل في شوارع وحواري مختلفة، لحد
ما وصل لعمارة شبه متهالكة دخلها ولكني وقفت
متردة مش عارفة اللي بعمله ده صح ولا غلط طب
لو طلع هو هتصرف ازاى! وبعد تردد كبير طلعت
وراه، كنت بتحرك من غير نفس وعلى أطراف
صوابعي، لقيته بيخبط على شقة معينة وبعدين
الباب اتفتح ودخل حاولت اطلع براسي شوية
أشوف هيئة اللي فتح الباب، ولكنه كان شاب
مقدرتش احدد اذا كانت ملامحه مألوفة ولا لاطلع برا
يتأكد إذا كان فيه حد ولا لا، فلزقت في الحيطه وأنا
بكتم نفسي، لحد ما لقيته دخل تاني طلعت
موبايلي بسرعة واتصلت على سليم، كانت أول مرة
تقريبًا أكلمه، فعشان كده خرج صوته قلقان_إيه يا

حببتي أنتِ كويسة؟ طلعت على السلم بشويش
وقربت من الباب وأنا بهمس_ هو الرجل اللي كان
معاكوا في الشقة ومات أوفردوز ليه توأم؟_ توأم؟!
قالها باستغراب فرجع كمل_ لا ملوش توأم تقريبًا
سندت براسي على باب الشقة بحاول اسمع أي
حاجة وأنا لسة بهمس_ طب أنت متأكد إنه مات؟
_منة إيه اللي بيحصل عندك، وصوتك موطياه ليه
كده؟! كان بيتكلم بعصبية طفيفة وبنبرة كلها
قلق_ الرجل مماتش يا سليم أنا متأكدة أنا لسة
شايفاه، هو نفس الشكل والهيئة والملامح، مشيت
وراه ولقيته دخل شقة، لازم نتأكد هو ولا لا... قاطعني
وحسيته بيتنفض من مكانه_ إيه بتقولي مشيت
وراه؟! أنت اتجننتي يا منة! افرضي حصلك حاجة! ما

يمكن حد شبهه! حاولت اهديه _متقلقش، تعالى ليا
على العنوان اللي هقولك عليه ده عطيته العنوان
بالتفصيل ورقم الشقة، ولكنه كان غضبان بشكل،
وزعق _اخرجي من عندك حالاً وأنا هتصرف! _يا
سليم! _ حالاً وقبل ما اتحرك لقيت الباب بيتفتح،
اتنفضت وأنا برجع لورا برعب، ولو هلة اتوسعت
عينيا واتجمدت مكاني لما لقيت سميرة هي اللي
قدامي، صدمة مقلتش حاجة عنها لما لقيتني في
وشها _سميرة! _منة!! اخرج صوت سليم اللي كان
بيزعق بتوتر _إيه اللي بيحصل عندك؟! منة دردي
علياد اتحركي من عندك بسرعة لمحت الرجلين اللي
كانوا جوا جايين ناحيتي، فاتفلت ونويت اجري،
وقبل ما انزل السلالم لقيت سميرة بتجذبني من

شعري بعنف صرخت بألم ورعب حقيقي، وقاومت
كثير، ولكنهم كانوا أقوى مني وسحبوني لجوا الشقة
بالعافية، وقع مني الموبايل في الأرض وارتكسر،
فمالت سميرة وخذته قبل ما ندخل كانوا مكتفني
وهما بيسحبوني لجوا، وبعنف زقوني على الكنبه
المتهالكه اللي في الصالة حاولت امثل القوة،
وقومت وقفت وأنا بصرخ_أنتِ اتجننتي يا سميرة!
بتخطفيني؟! ابتسمت بشر_فين اللي خطفتك ده يا
منون، ده أنتِ جاية هنا برجليكي راحت قعدت على
الكرسي، وحطت رجل على رجل_طول عمري بقول
عليكي لثيمة ودماغك شغالة صحيح ياما تحت
السواهي دواهي تربيتي بقى كانت نظراتي مليانه
كره، ونبرتي أكثر لما قولت_أنا تربية ناجي يا سميرة

واستحالة انسب تربيتي لواحدة زيك_مقبولة منك

يا بنت جوزي، ياللي بتتسحبي زي الحرامية

وتتجسسي على البيوت_سيبيني أخرج من هنا

بهدهوء يا سميرة أحسنلك ضحكت ضحكة غريبة

خلتني ارتجفت من جوا، وكأنها مكاتتش في حالتها

الطبيعية_وهو دخول الحمام زي خروجه

برضه؟وبعدين لازم اضايفك برضه، ده أنتِ بنت

الغالي. قامت وقفت وقربت مني بخطوات بطيئة،

ابتسمت وغفلتني وضربني بالقلم بقوة لدرجة

حسيت بفكي بيتكسر من قوته، مسكتني من

شعري وشدته بعنف_بقى بتغفليني يا معفنة

وبتقلبي الليلة عليا! ده أنا اللي عملتك قيمة

وخليتك في العز اللي أنتِ فيه دهدي جزاتي في الآخر!

حاولت اخلص نفسي من بين ايديها وأنا بصرخ من
الألم، لحد ما زقيتها بقوة وأنا بزعمق_والله لتندمي يا
سميرة على كل اللي عملتيه_وريني هتندميني
إزاي، مش كفاية فضحيتك بقت بجلاجل وسط
صحابك يا محترمة ضغطت على سناني بقوة وأنا
بمنع نفسي إني اقتلها بإيديا_كنت حاسة إن مفيش
غيرك يعمل الحركات الزبالة دي_لا أتأكدي يا
عينيا_ما تخلصينا بقى يا سميرة! قالها واحد من
الموجودين بنفاذ صبر وكأنه زهق من المسرحية
الهزلية اللي بتحصل قدامه دي_ما كان زمانا خلصنا
لولا بنت جوزي الغالية_سيبيني أمشي من هنا يا
سميرة أحسنلك قربت مني ونظراتها كلها غل
وحقد مشوفتوش قبل كده، زقتني بعنف وقعتني

على الكنبه اللي ورايا_أنتِ تترزعي هنا ومسمعش
صوتك طول ما أنتِ موجودة، لحد ما اشوف هطلع
منك بإيه أنتِ كمان لحظات وسمعنا صوت خبط
خفيف جدًا على باب الشقة، اتلفتوا كلهم وبعدين
بصوا لبعض، فاتكلم واحد منهم_أنتِ مستنية
حد؟ حاولت تتطمئنهم_لا متقلقش تلاقي حد من
الجيران سمع صويت الهانم. وجهت كلامها ليا
بتهديد_هروح أفتح الباب، لو سمعت صوتك
متلوميش إلا نفسك مردتش عليها وبصيت الناحية
الثانية بقرف._استني هفتح أنا وخليكي معاها
قالها نفس الشخص، فهزت راسها بالايجاب
وشاورتله يروح، وفعلًا اتحرك وهو بيفتح الباب
بطء، وفلحظة الباب اتزق بعنف لدرجة انه رجع لورا

وكان هيقع على ضهره لولا أنه صلب طوله ولكن
اتفاجيء لما لقي سليم قدامه ولكمه بقوة لدرجة
إن شفايفه نذفت اتنفذت أول ما شوفته، لوهلة
حسيت بالأمان لأنه موجود دلوقتي مترددش إنه
ييجي عشان يلحقني اترعب الراجل اللي كان شبیه
اللي سليم اتسبب في موته واتحرك لحد ما لزق في
الحيطة، في حين سميرة ملامح الخضة كانت باينة
عليها أكثر أما الراجل اللي سليم ضربه بالبوكس،
فاتعدل بسرعة وقال_سليم!والله العظيم هي اللي
دورت عليا لحد ما لقتني وعرضت عليا مبلغ كبير
قرب منه ولكمه بعنف مرة ثانية وهو بيزعق_وهو
مش كان اتفاقنا إن مفيش نسخ تاني؟مسك وشه
بألم_والله مفيش غير اللي على موبايلي وبعتلك

الرسالة بيها_هات الموبايل بدل ما اقتلك هنا من
غير ما اتردد! _حاضر، حاضر قالها برعب وهو ييمد
إيده في جيب الجاكييت البني اللي كان لبسه واداله
موبايله_أنتَ يا غبي!! صرخت بيها سميرة، فاتفلت
ليها وكانت عيونه مليانة شرار وغضب أول مرة
أشوفه فيهم، حقد وكره رهيب حسسني إن اللي
قدامي شخصية تاني غير سليم اللي اعرفه_أنتَ
تخرسي خالص، لسة دورك جي مجهزلك مفاجأة
تليق بيكي حسيت بوشها بهت ولكنه اتجمد مكانه
تمامًا لما عينه ثبتت على اللي لازق في الحيطه
بيترعش برعب، فضل واقف مبهوت وهو مثبت
أنظاره عليه_أنتَ؟ قالها بصدمة، فأتأكدت وقتها إن
الشبه ده مكانش صدفة فعلاً اتحرك وقرب منه

بخطوات بطيئة، كانت الصدمة متمكنة منه لدرجة
إنه حس بخدل في كل اطراف جسمه معقولة طول
السنين دي كلها شايل ذنب حاجة معملهاش! عاش
٦ سنين خايف وهربان، ٦ سنين كل من هب ودب
بيبتزه وبيعجزه وفي الآخر كل ده طلع مش
حقيقة_ازاي؟! هنا اتدخل الراجل اللي سليم ضربه،
كان خايف من بطشه ومن اللي ممكن يعمله سليم
بنفوذه الحالية، فحاول يلحق نفسه وقال_وليد اللي
خطط لكل ده يا سليم، والله أنا مليش دعوة، كان
عايز يطلع منك بمصلحة فطبخها معاه وخلاك
تشيل الليلة، كانوا متفقين على كل حاجة وهما
اللي ركبوا كاميرات في الشقة عشان يطلعوا منك
بمصلحة، أنا مليش دعوة والله_يعني كل ده

مكانش ميت! للحظة حسيت بالضعف والحزن في
عيونه سليم كان بيتألم طول الفترة دي وهو
معملش حاجة! كل حاجة جت عليه حتى أنا! أنا
نفسي لومته وحسسته إنه وحش وإنه قاتل! للحظة
لقيت ملامح وشه اتبدلت للغضب، زمجر بعصبية
وهو حاسس بنار جواه هتحرقه_يا ولاد ال...وفلحظة
قرب من الرجل ولكمه كذه مرة بعنف جريت عليه
بشده وأنا كلي خوف للراجل يموت في إيده وساعتها
يروح في داهية مكانش في حالته الطبيعية اللي
تخليه يستوعب هو بيعمل ايه كان بيطلع كل عذاب
السنين دي كله فيه_كفاية يا سليم كفاية بالله
عليك هيموت في إيدك! قدرت بالعافية إني اشدّه،
على قد الغضب اللي كان في عينيه كان فيه ألم،

كان مزيج بين مشاعر كثيرة جوا كل حاجة وعكسها
وقبل ما نستوعب لقينا الشرطة بتقتحم الشقة،
ومن الخضة مسكت في سليم واتداريت وراه وأنا
بيص عليهم برعب وكلي خوف لسليم يتثذي_إيه
اللي بيحصل يا سليم؟! طبطب على إيدي اللي
ماسكة بيها هدومه وهو بيطمني وبيبتسم بتشفي
ل سميرة وقال_المفاجأة وصلت اتجه واحد من
الظباط ناحية سميرة اللي انكمشت مكانها برعب
وصرخت وهي بتشاور ناحية سليم_والله العظيم
هو اللي اتجهم علينا. _ اتهجم عليكوا إيه يا مدام
سميرة! أنتِ مقبوض عليكِ بتهمة تعدد أزواج
شهقة مصدومة خرجت مني، برقت وأنا مش
مستوعبة إيه اللي سمعته ده حسيت بيها

اتلجلجت واترعبت_إيه اللي بتقوله ده يا حضرة
الظابط، ده كلام برضه!_عبد الرحيم كمال رافع
عليكي قضية بعقد جوازكوا العرفي بإنك اتجوزتي
ناجي ابراهيم من ٧ سنين وأنتِ على ذمته! هزت
راسها بصدمة_كذب ده كداب

متصدق هوش_هنعرف في النيابة كل حاجة خدوها
كلبشوها وخدوها هي واللي معاها وسط صويتها
وانهيارها فضلت واقفة مكاني مش مصدقة، أما
سليم كان بيتابع اللي بيحصل بتسلية_أنا مش
فاهمة حاجة شدي من وراه عشان أقف جمبه،
وحاوطني وهو بيقول_سميرة كانت متجوزة واحد
قبل أبوكي بعقد عرفي، سرقت اللي وراه واللي
قدامه ولبسته قضية نصب واتسجن سابت البلد

اللي هي كانت فيها وجت اتجوزت ابوكي وهي
ضامنة ان الاولاني في السجن والعقد مش موجود
فأنا دورت على جوزها لحد ما لقيته وكان فاكرها
هربت برا مصر بس وأنا كنت فاعل خير وروحت
قولتله مراتك اتجوزت عليك حطيت إيدي على
شفاي في بصدمة_روحت قولت للراجل مراتك
اتجوزت عليك يا سليم! ضحك بشدة وضمني ليه
وهو بيطلع قبلة قوية على خدي خلاني ضحكت،
اتصنع العبوس وقال_بقى ينفع تتصرفي من
دماغك يا هانم وتروحي تودي نفسك في داهية!
_على الأقل مروحتش قولت لراجل مراتك اتجوزت
عليك!الأوضاع هديت، سميرة اتسجنت فعلاً
واتثبتت عليها التهمة، محدش فينا كان متخيل إنها

طلعت بالقذارة ديدة غير إنها كانت نصابة أصيلة في
بلدها قبل ما تيجي هنا أما اللي كانوا معاها فطلعوا
مسجلين بالفعل وبيتدور عليهم كانت صدمة كبيرة
على بابا إن الست اللي عاش معاها ٧ سنين في
الأصل هي على ذمة واحد ثاني بعقد عرفي مسجل
عند محامي يعني مش ورقة حتى! ولكني فضلت
جمبه لحد ما قدر يتجاوز صدمته. والحاجة الوحيدة
اللي رجعتني للحياة ثاني هو سليم لما احساس
الذنب اتشال عنه بعد ما اكتشف انه ما ماتش ولا
حاجة وإنه عاش طول السنين دي موهوم بحاجة
محصلتش "عزيزي اكتب إليك الكلمات التي أبقىتها
في قلبي لسنواتٍ عديدة كنت ولا زلت حلمي الرجل
الوحيد الذي تمثّيته الحب الذي توغل إلى أعماق

قلبي وتملك مني وكأنه لا يوجد إلا أنت فأينما
اتجهت أجدك وأي شيء جميل آراه يُذكّرني بك
المشاعر الصادقة التي عاصرتها بجميع مراحل
حياتي من شعرت بجواره بالحياة بعد سنوات عجاف
إنك تسكن في أعماق ذاكرتي وقلبي لا مفرد من حبك
كـ "خلصت كتابة في كل طريقي تؤدي إليك أحب
الدفتري بتاعي، دفتري عمره أكثر من ٦ سنين بكتب
فيه من يوم ما وعيت على حبي لسليم وهو
مكانش يعرف عنه حاجة قفلته وحطيته تحت
المخدة، ونمت وأنا بتمنى لو ييجي اليوم اللي نكون
فيه مع بعض من غير خوف أو قلق. من غير
صراعات وتجريح في بعض نعيش حياة طبيعية في
بيت مليون دقي وحب بس.. رجعت من الجامعة بعد

يوم طويل، وصلت البيت واستغربت لما لقيت
المفتاح في قلب باب الشقة لإن بابا مبيبقاش
موجود في الوقت ده، فمكان المفتاح بيبقى تحت
الدواسة اللي قدام الباب عشان لما ارجع، فتحت
الباب وأنا كلي استغراب، واللي زاد اكثر لما لقيت
الشقة فاضية، نديت على بابا فملقتش رد منه،
زفرت وقولت لنفسي إنه نسي يحطه تحت
الدواسة. اتحركت لاوضتي وفتحت الباب، وللحظة
اتجمدت مكاني تمامًا لما شوفته قاعد على السرير
ماسك الدفتر بين إيديه ابتسم أول ما شافني،
ساب الدفتر ووقف، وفضلت أنا مكاني بتأمله
بشغف وعدم تصديق كانت عيونه مليانة دفي
ونظرات كلها اشتياق دقات قلبي أعلنت تمردها،

جسمي ارتجف لما ريحة برفانه وصلت ليا، مكنتش
مستوعبة إنه هنا! جالي وبإرداته! اختارني من غير
إجبار من غير تهديد ولا ابتزاز سليم هنا علشاني أنا!
وبدون تردد جرّيت عليه، فتح إيديه وضمّني، لفيت
إيدي حوالين رقبتة وأنا بدفن راسي بين تجويف
عنقه كل واحد فينا عرف قيمة الثاني وعرف إنه
محتاج للتاني كل واحد فينا اتأكد إنه مش هيقدر
يكمل من غير الثاني بعدت عنه بالعافية وأنا لو عليا
أفضل جوا حضنه لأيام وسنين. _ دخلت هنا
إزاي؟ ملّس على شعري بحنان _ لحقت باباك قبل
ما يروح شغله، وقولتله أنا جاي آخذ مراتي
ابتسمت _ هو فين؟ غمز بعث _ راح هو وبابا يجيبوا
المأذون عشان متفضليش كل شوية تقوليلي أنا

مراتك على الورق، ملكيش حجة أهو بقى!ضحكت
وأنا بضمه ليا بقوة كنت فرحانة بشكل! كان قلبي
بينبض بعنف وحاسة إن طايرة! بعدت عنه وأنا
بيصله بنظرات كلها حب، وهو نظراته مكانتش بتقل
عني، كانت عشق وحب خالص كان متدارى وقت
ركام ماضي قاسي علينا إحنا الاتنين بص للدفتر
اللي على السرير ورجع بادلني بنظرات كلها غرام،
فحطيت كف إيدي على خده، مال براسه كإنه
بيشبع نفسه من اللمسة دي ابتسمت_عزيزي يا
صاحب الوجه الجميل بحبك.... وأخيرًا انتهت
حكايتنا بنهاية سعيدة وبقينا مع بعض.. "وگيفَ
آتوبُ عنگ والقلب في حضرتگ" تمت#
تحت_التهديد# منة_ممدوح_البنا

———— Part Break ————

———— Part Break ————

_تاخدي كام مقابل دخولك لبيت أيوب الحسيني؟
كانت واقفة قدام مكتبه بتراقبه، اتبدلت نظراتها
للتعجب وسألت_مش فاهمة؟ كان قاعد بيتأملها
من فوق لتحت، شايف إنها بالفعل مناسبة لمهمة

زي دي بل وهتحقق زي ماهو عايز تمامًا، قام وقف
ولف حوالين المكتب ببطيء وهو بيقول_أيوب
الحسيني، معروف عنه إنه شخصية لعبية، يوقع
الواحدة في حبه، وبعدين يرميها من غير ما يرقله
جفن، فيه منهم اللي كان بيوقعهم بعقد عرفي، وفيه
اللي من غير جواز أصلاً وقف قصادها وهو حاسس
بنشوة من نظرات الفضول والاهتمام اللي كانت
ظاهرة عليها وكمل_عايزك تدخل بيته، تدسيه
كاميرات، أو تسجيلات، تصوري العقود العرفي اللي
عاينها، تشوفي لو فيه أي فيديوهات ممكن تدينه
وتجيبهالي سألت وهي بتضيق عينها بفضول_وده
ليه؟ اظلمت نظراته وضم قبضة إيده اتلفت وهو
باصص قدامه بغضب شديد ورد وهو بيجز على

سنانه_تار قديم عبثت في خصلات شعرها الفاتحة
بقلق، فاتفقت فجأة وهو يقول_مليون كفاية؟
اتلجلت من المفاجأة وقالت بتلعثم_بس...
قاطعها وهو يببصلها بتركيز_٥ مليون... دولار برقت
من الدهشة، مكاتتش متخيلة إن خصم زي ده
يكون غالي بالشكل ده، وقبل ما يديها فرصة تفكر
قال_يبقى ٥ مليون دولار هتاخدي منهم مقدماً
شيك بمليون مقابل دخولك البيت، والـ٤ بعد ما
تنفذي المهمة حسّت بخدل في كل جسمها وهي
مش متخيلة إنه بالفعل هينفذ كلامه، ولكن قطع
سيل افكارها لما طلع دفتر شيكاته من درج مكتبه،
وكتب المبلغ ومد بإيده ليها بالشيك وهو
يقول_اتفقنا؟ اتناقلت نظراتها بينها وبين إيده

بتردد، هي مدركة كويس إن لعبها مع شخص زي
أيوب هيكلفها حاجات كتير، وممكن هي كمان تقع
ضحية تحت إيديه، ولكن مبلغ زي ده هيجليها
مليونيرة حرفيا، تأسس شركة، تعمل مشروع، حتى
تلف العالم، ورغم التردد اللي ظهر عليها وسط
مراقبته ليها إلا إنها ابتسمت ومدت إيديها وهي
بتخطف الشيك وبتقول_اتفقنا..... فاقت من
ذكرياتها وهي واقفة بعريبتها اللي اداهاها الشخص
صاحب المهمة عشان بس تعجب أيوب، كان لازم
يחס إنها بنت ناس من الطبقة المخملية عشان
يزيد اعجابه بيها ترارارار الرواية